

1 Kolini

Polo'a Efesusi kumate maineno mani avona Kolini kumate maine'ya Yisasife havi'ya amakupi malenaya vea'mogamife kae-malene. Yisasi'a faliteno hetino ikapinaga haitegeno Polo'a tueti tali'a (23) kafu agava maineno 1 Kolini kea kae-malene. Ani vea'mo'ya hagote'ya avona kae'ya havigageno kenona'amile mani avona kaeno amamine.

1-2 Nagaya Polo'nae. Anumaya Kotina haigeno nagaila hapalinateno “Yisasi Aposolo kano maiyo.” huno humaineafe nagayaene taganatimo'a Sosetenesi'ene mani avona kaeta'a Kolini mainetama Yisasi kea tamametiti hutama Yisasi Kalaisi'ene ailokaetama mainayafe alu aotage vea'ne mainae. Muki'a kotega vea'nene Anumayatimo Yisasi Kalaisi agile nunamu nehaya vea'nene tamakaife'enenaga'ai'a alu aotage vea'ne'a maisayafene huno hapalilamatene. Yisasi'a amakai'ene tagai'ene Anumayatimo maine.

³ Anumaya Koti'a, Nelafa'ene Yisasi Kalaisi Anumayatimo'ene kayone hisaya ya'ene tamaipa falu hisia ya'ene tamamisa'e.

Polo'a nunamu huno muse humaine.

⁴ Yisasi Kalaisi'ene ailokaetama maigeno Anumaya Koti'a agai'a kayone yama'a tamamineafene hu'na nagaya muki'a kanafina

tamakaifena Anumayamotega muse hu'na nunamuna nehue.

⁵⁻⁶ Kalaisi kea ago tamahapaugetama havilama hulinetama ani keleti Anumaya Kotifema havitama tamakupi malayana Yisasi'ene ailokaetama maigeno Anumaya Koti'a muki'a tokiya'a ago tamamineanagitama nago'a vea'mogamina mani kea hamapaisaya tokiyatamia hane.

⁷ Haneanagi meni kanafina Anumayatimo'a Yisasi Kalaisi'ma ikapinagati elavino fufu yate'ma esiafe tamametitia hutama agava mainageno Alu Aotage Avamu'mo'a tokiya yama'a kasago'ya tamamineana-gitama nago yafena aupa nohae.

⁸ Yisasi'a tokiya vaitama maisaya yana tamamisigetama tokiya vaitama mainetama ma mopama ha'no hisia yupa kefo yatamia omalenageno Anumayatimo'a Yisasi Kalaisi'ma kaiyeke hulamatesia yupa kanale'ya hutama hetigahae.

⁹ Anumaya Kotina nafa'ne'amo'a Yisasi Kalaisi'e Alatimo'ene nagoke tamaipale maisayafe tamakaila ke huno "Na'a hugahue." huno hulamatenea kea o'atalegahianagino ani kavala hugahie.

Yisasifema havi'ya amakupi malenaya vea'mo'ya apase'ya mainae.

¹⁰ Nafu'nagana-gatama Alatimo'a Yisasi Kalaisi agile tokiya'age kea tamahanepauve. Nago'a

tamakesa havitama alu ke alu kea ohutama apao-
hetama mainetama nagoke tamaku tamakesale
maiho hu'na tamahanepauve.

11 Nafu'nagana-gatama Koloe anaga'mo'ya
tamakaifena mage hu'ya nahapaiye “Amakaya
ke vaige vaige yate nemaiye.” hu'ya nahapaiye.

12 Tamakaya ani kema ne'vaiya yana
nagoke'mogatama “Tagaya Polo vea'ne
mainone.” hutama hage'ya nago'amogatama
“Tagaya Apolosi vea'ne mainone.” hutama
hage'ya nago'amogatama “Tagaya Pita vea'ne
mainone.” hutama hage'ya nago'amogatama
“Tagaya Kalaisi vea'ne mainone.” hutama nehae.

13 Na'a higetama ani kea nehae? Kalaisi
augafamo'a akalu kale-peno haote haote hu-
maineo? Nagaila Polonina tamakaife hu'na
yafaga yosale nahae'ya asaige'na fali-maino?
Ifi nagaila Poloni nagile tina fale-lamatenao?
A'ao tamakaya “Ma kanomo mono ke nehavuna
vea'ne mainone.” hutama ohiho.

14 Tamakai amu'nopina Kalisipusi'ene
Kaiyusi'ene tina falenatenoe. Nago'amogamina
fale o'amatenoa yafena muse nehue.

15 Havigu nago'a vea'mo'ya “Polo agile tina
falelatenae.” hu'ya hisagi.

16 Tamage nagaya Setefanasi nofi anaga'ene
tina falematenoe. Nago'a vea'nenena falemate-
nesuo fale o'amatenesuo nagesa ohavinoe.

17 Kalaisi'a tina falelamatesuafene huno hu-
natege'na omenogi agai'a hulatenea yafe kanale
mono kema huhale'na tamahapaisuafene huno

hunatene. Mani kea ma mopafima kanale-havi'ya'ami hanea vaya'mo'ya nehaya augafa kema hisuana Yisasi Kalaisi'a yafaga yosale'ma fali-mainea kemo'a afa ya kana hu yafenagi'na na'a augafa kea ohugahue.

Kalaisi'a Anumaya Kotina tokiya'a maine.

¹⁸ Hani yapi, tegelege nehia atafi, visaya vea'mo'ya Yisasi'a yafaga yosale'ma fali-mainea kehena “Havigu-nagu ke nehae.” hu'ya nehayanagi tagaya Anumaya Koti'a tagu tamema ali negatea vea'mogata Yisasi'a yafaga yosale'ma fali-mainea kemo'a “Anumaya Kotina tokiya'ae.” huta nehune.

¹⁹ Anumaya Koti avopina mage huno kae-maleneane
 “Nagaya muki'a kanale havi'ya'ami
 hanea vea'mogamina havilinaya
 yana alitalesugeno fanane hugahie.
 Kanale amaku amakesama hanesia
 vea'mogamina amaku amakesa ali ha'no
 hutalegahue.” huno Anumayamo'a
 humaineane.

²⁰ Kanale havi'ya'amima hanea veafena na'ane hisune? Kahegi kema havilinaya veafena na'ane hisune? Ma mopale yafema amakemo'ma nehaya veafena na'ane hisune? Anumaya Koti'a ma mopale yafe kanale havi'ya'amima hanea vea'mogamifena “Havigu-nagu ke nehae.” huno humaine.

²¹ Anumaya Koti'a tusi'a kanale havi'ya'a hanea kanogino agai'a haiya kava huno “Ma mopafi vea'mo'ya amakai'ami havi'ya'amima

hanea yateti nagaila nagelama hu'ya onagegahae.” huno huteno haiya agesa mage huno havimaine “Yisasi'a hulatenea yafena kanale mono kea, huhaletama hamapaiya kema havi'ya amakupi male'ya amametiti humainaya vea'mogamina amaku amamena aligatigahue.” huno humaine.

²² Yuta vea'mo'ya “Tokiya'age avame yana hisanageta ageteta Kalaisife havita lagupina malegahune.” hu'ya hage'ya Kaliki vea'mo'ya “Muki'a yana havita kanale havi'yatiene vea'ne maisune.” hu'ya hae.

²³ Hayanagi tagaya Kalaisi'a yafaga yosale'ma fali-mainea kema huhaleta hamaneapaunana Yuta vea'mo'ya tagaifena “Tayo hia ke nehae.” hu'ya amakave'no hutage'ya Yuta vea omainaya vea'mo'ya “Ani kea havigu-nagu ke nehae.” hu'ya humainae.

²⁴ Hayanagi tagaila Anumaya Koti'ma hapalilatenea vea'mogata, Yuta vea'nene Yuta vea omainaya vea'nenena, ago havimainone Kalaisi'a Anumaya Kotina tokiya'agino kanale havi'ya'a hanea kano maine.

²⁵ Anumaya Kotifena “Havigu-nagu agu agesa hane.” hu'ya nehayanagi muki'a mopale vea'mogamina havi'ya'ami amakase-maine. Anumaya Kotifena “Nago'a fulu fulu yama'a hane.” hu'ya nehayanagi ani fulu fulu yama'amo'a ma mopafi vea'mogami tokiya'amimona amakase-maine.

²⁶ Nafu'nagana-gatama Anumaya Koti'a

tamakaila hapalilamatenea yupahe tamakesa havi havi hutama haviho. Tamakai amu'nopina ma mopale kanale havi'ya'ami hanea vea'nene mopale tokiya'amima hanea vea'nene amakima hanea vea'mogami nafa'neyagaene kasago'ya omainayane.

²⁷ Omainagi havi'ya'ami hanea veala amakaye hisiafe Anumaya Koti'a ma mopale yafe havi'ya'ami omalenea vea'nea hapalimatene. Tokiya'amima hanea vea'mogamina amakaye hisiafe ma mopale fulu fulu nehaya vea'nea hapalimatene.

²⁸ Ma mopafina amaki hanea vea'mogami tokiya'amia heno fanane hugahe ma mopafina amaki omale vea'nene “Afa vea'ne mainae.” hu'ya haya vea'nene hapalimatene.

²⁹ Nago kanomo'a Anumaya Koti aufina augafa alino nehaino agai'ahena “Nagaya nagi hanea kano mainoe.” huno ohisiafene huno Anumaya Koti'a ani'a augafa veala hapalimatene.

³⁰ Anumaya Koti'a agai'a “Yisasi Kalaisi'ene ailokaetama maiho.” huno nagopi alino ailokaelateneafe Yisasi Kalaisi'a tagaya havisuna tagu tagesamona aepa'a maine. Yisasi'a hulatenea yateti Anumaya Koti'a havi yapitila ago miya hulateneno tagaifena “Fatago vea'ne mainae.” huno hulateneno alu aotage au'ava yama hisuna tokiya'a tamine.

³¹ Ani yama hulatenea yafena Anumaya Koti avopina mage huno kae-maleneane

“Nago kanomo'a agai'a agima alisaga hisia age-

sama havinuno¹a ne¹ataleno Anumayamo
agi alisaga huno musena hino.” huno
humaineane.

2

*Polo¹a Kolini vea¹mogami amametitihe hu-
maine.*

¹ Nafu¹nagana-gatama nagaya nayona
tamakaite Anumaya Koti kema me lamaha-
pauvana havi¹ya¹ami hanea vea¹mo¹ya nehaya
avamete hu¹na tamaipafinaga tamahaisifa kea
tamahaopainoe.

² Nagai¹nia nagu¹afinaga mage hu¹na havi-
mainoe “Nagaya tamakai amu¹nopima mainoana
nago¹a yafena tamahaopaigahue. Nagaya Yisasi
Kalaisi¹a yafaga yosale¹ma falimainea yafeke¹ya
tamahapaigahue.” hu¹na humainoe.

³ Hagote¹na tamakai¹enema mainoa kanafina
foli foli hu¹na koli nehu¹na atali hu¹na mainoe.

⁴⁻⁵ Atali nehu¹na Anumaya Koti tokiyahe
havitama tamakupi maletama tamametiti hisae
hu¹na ma mopafi havi¹ya¹ami hanea vea¹mo¹ya
nehaya augafa kea ohunogi Avamu¹mo
tokiyaleti kea huhale¹na tamahapai-mainoane.
Havi¹ya¹ami hanea vea¹mo¹ya nehaya kekena
tamametitia ohisae hu¹na Yisasifena kanale
mono kea humainoe.

*Anumaya Koti Avamu¹mo¹a kanale tagu tagesa
nelamie.*

⁶ Anumaya Kotina amaku¹a amitafa hu¹ya
akave nemalaya vea¹mogamifena tokiya¹age
kea nehuanagi ma mopafi havi¹ya¹ami hanea

vea'mogami augafa kene, ma mopafi kava yagai-mainaya vea'mo'ya nehaya augafa kene, fanane hisia kea nohue.

⁷ A'ao, tagaya Anumaya Koti agu agesamo'a falaki-mainea ke tamahanepaune. Anumaya Koti'a ma mopama talo ohuneno'a hagoteno nago kea humainegeni falakino haneanagino menia lagaya Anumaya Kotitegati tokiya hale yama'a alisunafe mani kemo'a falote humainone.

⁸ Ma mopafi kava vaya'mo'ya mani kemona aepa'a ohavinae. Mani kema havimainasina tokiya hale yamo aepa'a hanea kanoa, Anumayamonona, yafaga yosalela nilia he'ya o'asaisine.

⁹ Anumaya Koti avopina mage huno kae-malenayane

“Taulagamo'a o'agenea ya'ene tagesamo'a ohavinea ya'ene vea'mogami amaku amakesafiti omalenea ya'enena Anumaya Kotina amaku'ama aminaya vea'mogamife talo tala humalene.” hu'ya kae-malenayane.

¹⁰ Vea'mo'ya o'agageno falakino hanea kea Anumaya Koti'a agai'a Avamu'aleti taveli-maine. E, Alu Aotage Avamu'mo'a muki'a yana atiyeno Anumaya Kotina falakino hanea agu agesaene agemaine.

¹¹ Hana vea'mo'ya nago kanomo'ma agesama nehavia yana agemaine? A'ao o'agenagi agai'a agupima mainea agu nafa'moke'ya agemaine. Ani kava huno nago'a vea'mo'ya Anumaya Koti'a agu agesafima havia yana ohavinagi agai'a

Avamu'moke'ya agemaine.

¹² Anumaya Koti'a ma mopafi vea'mo'ya nehaviya amaku amakesa notamigi tagai'ma Anumaya Koti'a taminea kema havilama huta havisunafe ani Alu Aotage Avamula tamigeta avalemainone.

¹³ Tagaya mani kea huhaleta nehune. Ma mopale kanale havi'ya'ami hanea vea'mogami ke kana huta nohunagi Avamu'mo tahapaiya kege'ya tamahanepaunageno ani Avamu'ma amakupi mainea veafeke'ya sili huta hamanepaune.

¹⁴ Hamanepaunanagi Alu aotage Avamu'mo'ma amakupi omainesia vea'mo'ya ani Avamu'mo kea havi'ya akave malesaya amuko'amia omaleneanagi'ya “Mani kea havigu-nagu ke nehae.” hu'ya nehu'ya Avamula o'avalenayanagi'ya aepa'a havisaya amuko'amia omalene.

¹⁵ Alu Aotage Avamu'ma amakupi mainea vea'mo'ya muki'a aepa'a haviya yamona fako hugahayanagi nago'a vea'mo'ya agaifena “Na'a kano mainane.” hu'ya fako hu o'ategahae.

¹⁶ Anumaya Koti avopina mage huno kae-maleneane

“Anumayamo nehavia agu agesa hana'a vea'mo'ya haviline'ya Anumayamo ali'ya alisia yafena hapaigahae?” huno humaineane.

Na'a ohugahagi Kalaisi'a agai agu agesa ago tahapaino tamigeta agai kemo aepa'a havilinone.

3

Mono ali'ya vayala Anumaya Koti ali'ya vaya mainae.

¹ Nafu'nagana-gatama tamakai'ene maine'na, Avamu'mo'ma amakupi mainea vea'mo'ya havisaya avamete kea ohunogi tamakaya atafa lamaipale, osi nafa'ne kana hutama mainage'na Kalaisi humainea au'ava yafema nohavinaya vea'mogami avamete kea tamahapai-mainoe.

² Tamakaya tokiya'age kema hisua kea ohavigahayanagi'na nu tamamisua avamete ke tamahapai-mainoe. Meni kanafi'enena ani'a hu'na nu tamamisua avamete ke tamahanepauve.

³ Na'afene atafa lamaipamo akave maletama mainetama tamafu-tamakana-gamifena tamaipa haviya humatetama kema vaimatayana atafa lamaipa hanegetama ma mopafi vea'mo'ya nehaya kavake'ya nehae.

⁴ Nago'amogatama “Polo tahapaiya kele akave nehune.” hutama hagetama nago'amogatama “Tagaila Apolosi tahapaiya kele akave nehune.” hutama nehae. Ani kava'ma nehayana ma mopafi vea'mo'ya nehaya avamete kava nehae.

⁵ Apolosi'a hana'a augafa kanoe? Nagaya Polo'na hana'a augafa kanoe? Ta'agaya ali'ya kanolatake maino'e. Anumaya Koti'a alu ali'ya lu ali'ya ta'amigeta'a ne'alule. Ani ali'yateti tamakaya Yisasifena havitama tamakupina maletama lamametitia humainae.

⁶ Nagaya Yisasi kea tamakupina fai-maletogeno Apolosi'a tima'a hefino taki-maleneanagi Anumaya Koti'a agai'age alino aifalo higeno hagemaine.

⁷ Na'a humainegi avina yama fai-malenea kanomo agiene tima taki falu hu-malenea kanomo agienena omalegi avina yama alino aifalo higeno hagemainea kanoa, Anumaya Koti agige'ya alisaga hisune.

⁸ Anumaya Koti kema faimalenea kanoene tima takino falu humalenea kanoene nago ali'ya alimaina'e. Ani ali'yatetila tolemogania alimaina'a avamete anona'ania aliga'e.

⁹ Ta'agaya Anumaya Koti'ene ailokaeta'a ali'ya kanolatama'a maino'e. Tamakaya Anumaya Kotina hoya'a kana hutama mainae. Tamakaya Anumaya Kotina noma'a kana hutama mainae.

Mono ali'ya vea'mo'ya kamuta vaya kana hu'ya mainae.

¹⁰ Tamakaya Anumaya Kotina noma'a mainage'na Anumaya Koti'a kayone yama'aleti nagaya no ki ali'yate kava kano maine'na yafateti tunagea ago ayemalenoge'ya nago'a vea'mo'ya nona negiye. Muki'a vea'mo'ya amakesa havilama hute'ya kanale'ya hu'ya kiho.

¹¹ Anumaya Koti'a tokiya'age no yosamo'ma noma atafa nehia yosa Yisasi Kalaisina agai'age ategeni maineanagi'ya nago'a vea'mo'ya alu tokiya noma atafa hisia yosa o'ayegahae.

12 Nago'a vea'mo'ya haya keleti ani nona tokiya'age huno falu otesia yosaleti'ene u yosaleti'ene yafateti'ene negiyanagi nago'a vea'mo'ya hofaleti'ene vitimo alapaleti'ene aupa'a kasalisia yateti negiye.

13 Negiyanagino Anumaya Koti'a kaiyekema hulatesia kanafina muki'a vea'mogami ali'yamo aepa'a haote haote huno atamo anefe'mo avame humateno amakege amakege hutesige'ya ali'yama ali-mainesaya ali'yamo aepa'a fufu yate ali falote hugahie.

14 Nago'a vea'mo'ya tokiya'age u yosaleti kimalenaya avamete hu'ya ki-malenesaya no'amimo'ma atama otesigeno kanale'ma huno hanesiana ani vea'mo'ya kanale miyana anona'amia aligahae.

15 Aligahagi nago'a vea'mo'ya ki-malesaya no'amimo'ma atama lesigeno'a muki'a ali'yama'amimo'a fanane hugahianagi atafiti vea'ma ali vati huna avamete huno amakai'ami amaku amamena aligatisige'ya maigahayanagi'ya anona'amia o'aligahae.

Tamakaya Anumaya Kotina alu aotage noma'a mainae.

16 Tamakaya Anumaya Kotina alu aotage noma'a mainageno Anumaya Kotina Alu Aotake Avamu'amo'a tamakupina maine. Tamakaya ani yana havilama ohunao?

17 Nago'a vea'mo'ya Anumaya Koti'ma mainea noma'ama ali haviya hisayana Anumaya Koti'a amakaina ali haviya humategahie. Anumaya

Koti noma¹a alu aotage nona haneanagitama tamakaya ani nona mainae.

Veal'mogami amakia alisaga ohisune.

¹⁸ Havigu tamakaitamihe havige ayemavataga hisagi. Nago¹amogatama “Mopafi veal'mogami havi¹ya¹miene vea¹ne mainone.” hu¹ya hisayana na¹a amaku amakesa ataleta¹ya amakesa nohaviya vea kana hu¹ya maisayana kanale havi¹ya¹miene vea¹ne maigahae.

¹⁹ Ma mopafi havi¹ya¹ami hanea vea¹mo¹ya Anumaya Koti aulagafina amakesa nohaviya vea¹ne kana humainae. Anumaya Koti avopina mage huno kae-maleneane

“Ma mopale havi¹ya¹amiene vea¹mo¹ya savale¹age nehageno Anumaya Koti¹a vea¹mo¹ya kalifuma hanagi-malene¹ya neha¹yafiya avamete huno amatafa nehie.” huno humaineane.

²⁰ Nago¹ene mage huno humaineane

“Anumayamo¹a haviana ma mopale havi¹ya¹amima hanea vea¹mo¹ya nehaviya amaku amakesamo¹a afa ya kana humaine.” huno humaineane.

²¹ Na yafe “Ma veala kanale vea¹ne mainae.” hutama amakia alisaga ohiho. Anumaya Koti¹a muki¹a yana tamamine.

²² Polo¹nagi, Apolosi¹agi, Pita¹agi, ma mopaene tamahaimu¹ene, fali ya¹ene, meni kanaene, haenagama falote hisia kanaene, muki¹a yana Anumaya Koti¹a tamamine.

23 Tamamigetama tamakaya Kalaisi ayapi maigeno Kalaisi'a Anumaya Koti ayapi maine.

4

Anumayamo'a agai'a ali'ya vaya'amogamina fako nehie.

¹ Yisasi kema tamahanepauna vaya'mogatihena mage hu'ya hisae “Yisasi Kalaisina ali'ya vaya'amo'ya maine'ya Anumaya Koti'a nayoma falaki-malenea kea yagai-maine'ya huhale'ya nehae.” hu'ya hisae.

² Kavayagaisaya veafena “Efi efi hutama ali'yana aliho.” huno humaine.

³ Tamakayaene nago'a vea'nene nagai'ma fako hutama nagaya kanale'ya hu'na tamahanepauvo havi kava hu'na tamahanepauvo hutama hisaya yafena kolia nohue. Nagai'nia nehua yafena nagai'ni'a fakoa nohugi Anumayamo'a agai'a fako hunategahie.

⁴ Nagaya agoana “Fatago ali'ya kano mainoe.” hu'na nehuanagi Anumaya Koti aulagafina fatago ali'ya kano maino ifi omainoe huno Anumayamo'a agai'age “Na'a humainane.” huno nagaila fako hunenate.

⁵ Kaiyekema hulatesia kanamo'a yaufa falote ohuneanagitama tamakaya veala alitama “Na'a kavala havi kava nehae.” hutama hu o'amateho. Anumayamo esia kanafina agava mainesageno muki'a vea'mo'ya kefo yama, hani yapi falaki-mainea yana, Anumaya Koti'a hale yate alino

falote hugahie. Anumayamo'a agai'a amahaote amahaote amaku'a amaketeno "Kanale humainao kefo ya humainao." huno agai'a alino fako huteno vea'mogamina humainesaya avamete Anumaya Koti'a agai'a muse yana amamigahie.

Kolini mainaya vea'mo'ya amakai'ami amaki alisaga humainae.

⁶ Nafu'nagana-gatama tamakaya havisae hu'na nagai'ene Apolosi'enema alitama fako ohisaya kea nehu'na kaana tamave-nelue. Anumayamo avopifena mage hie "Okaenesaya kea ohiho." hu'ya humainaya kea havitama akave nehutama nago'a vea'mogami amakia alisaga nehutama nago vea'mogami amakia ali haviya nehaya kavala ohiho.

⁷ Tamakaya muki'a vea'ma mainaya avamete hutama mainagi alu'a avametela hutama o'amakasenagi muki'a yana Anumayamo'a tamamineanagi na'a higetama "Nagai'ni'a ani yana ali falote nehue." hutama tamakesa havitama tamaugafa alitama nehaiye?

⁸ Tamakaya ma ke hutama nehao? "Tagaitigeke'ya Yisasi kema havuna kea hai havimainone. Polo'ene Apolosi'ene mani kea tahapai'ageta ohavinonagi tagaitige'ya hai havilinetasauve vea'ne mainone." hutama nehao? Ani kava'ma humainele'asina ta'agai'enena ani'a huta'a sauve vaya kana huta'a maino'ale'asine. Tamage tamakaya ani avamete vea'nea omainae.

9 Nagaya ma nagesa nehavue Anumaya Koti'a tagaila Aposolo vayala haenagalafa maisunafe hulatene. Nayoma kame vaya'ma hamaegahe amavale'ya kumate emainage'ya amakete'ya kigi hu ne'amataya avamete kava nehageta tagaya haenagalafa vaya kana huta mainonage'ya “Hamaesage'ya falisae.” hu'ya hage'ya vea'mo'yaene ensole vaya'ene tagaila nelage'ya kigi hunelatae.

10 Tagaya Yisasi Kalaisi ali'ya ne'alunanagita aifo vaya kana huta mainonagi tamakaya Kalaisi'ene ailokaetama mainetama kanale havi havi'yatami hanea vea'ne mainao? Tagaya tokiyatia omale vaya maunagetama tamakaya tokiyatami hanea vea'ne mainao? Tamakai tamakia alisaga nehayanagi tagaifena “Otahaiya vaya mainae.” hu'ya nehae.

11 Yisasi kema hamaneapaunafe nayo'lene meni kanafi'ene neyafena lagala neleno tifena nelageno nehie. Kenatia haviya nehuno faesuna no'lenena omalegeta vaiyatete nehunage'ya ka'yo kevea nelamiye.

12 Kaveti ali falote hisuna yafena tayapitila tusi'a ali'ya ne'alune. Vaya'mo'ya tagaila hu-haviya hu nelatayanagi anona'a kanale manua ne'amamune. Tagaila tusiya hu'ya ali haviyana hulatayanagi tagaya tokiya vaita mainone.

13 Hu-haviya hu nelatayanagi anona'amia ako huta falu hamaisifa ke hune'amatone. Nayo'lene meniene vaya'mo'ya tagaifena “Kasali-mainea yama halafi hutalaya avamete vaya mainae.”

hu¹ya nehae.

Polo¹a “Nagai au¹ava akave male ho.” huno hamapai-mainie.

¹⁴ Mani kea havitama tamakaye hisie hu¹na nokaogi nagaila nahaiya nafa¹neyagamo-gatama ali lamakafa hisue hu¹na mani kea kae-malenoē.

¹⁵ Kalaisima akave visaya kea teni tauseni¹a (10,000) vaya hulamave-lisayana nagaya nagai¹nige nagoke nelamafa¹na mainoē. Yisasi Kalaisi kanale mono kema tamahapaugetama havitama Anumaya Kotina tamaku¹a amitafa hageno agai¹a nafa¹neyaga lamateneafe nagaya nelamafa¹na mainoē.

¹⁶ Mainoa yafe nagayama nemauva au¹ava kavala agetetama akave maletama maiho.

¹⁷ Ani yafe Timotina hutogeno tamakaite umaine. Timoti¹a Anumayatimo¹ene ailokaeno maineno kanale ali¹ya ne¹alianagino nagaila nahau nayamopafi nenahaiya nafa¹ne¹ni¹a maineafe nagayama Yisasi Kalaisi¹ene ailokae¹na maine¹na vai ne¹ayoa au¹ava yafena tamahapaiteno ani kate visaya kea huno tamakesa hugahie. Muki¹a kumate uvana Yisasife havi¹ya amakupi malenaya vea¹mogamina mani kea hamanepauvane.

¹⁸ Nago¹amogatama nagaifena “Omegahie.” hutama nehutama tamakaitami tamaugafa alitama nehaiye.

¹⁹ Nehaiyanagi Anumayamo¹a hainegenoma “Vuo.” huno hunatesige¹na iva aupa¹a ago

egahue. Ne'e'na amakai'ami amaugafa ali'ya nehaiya vayala mo ne'amake'na nagaifema nehaya kea havite'na tokiya'amiene agegahue.

²⁰ Anumaya Koti'ma kava yagai-mainea yamo aepa'a ke'agela omalenegi Anumaya Kotina tokiya'a alita maisuna yamo'enena aepa'a hane.

²¹ Tamakaila na kava hisuafe nelamahiye? Kelama-kisua kema hisua yafe esuo? Ifi ako hu'na tamakaifena aluya huno nahau nayamopafi nenahaiya kava hugahe esuo? Ani yafena lamakesa nehavitama etetama fatago hutama maisayana tamakaifena nahau nayamopafi nahau-mainenage'na eva'yi hano.

5

Kumai he yamo'a Kolini veapina hane.

¹ Nago kema falote hige'na havuana Yisasi kema nohaviya vea'mo'ya nohaya kefo yana tamakai veapitila nago vea'mo'ya maitama nehae. Nago kanomo'a nefa a'ene kumai heno alitea tamavagea hage'na havi-mainoe.

² Havuanagi na'a higetama tamaugafa alitama nehaiye? Na'a higetama tamahauna hutama tamakayea nohigetama tamakaipitila ani kanoa anati no'atalae.

³ Nagaya alule mainoanagi afa'a nagu namemo'a tamakai'ene mainege'na ani kefo yama humainea kanomofena "Kefo ya nehie." hu'na Yisasi Kalaisi agile nehue.

⁴ Anumayatimo¹a Yisasi agile alitalu hutama mainageno nagaila nagu namemo¹ene Yisasi Kalaisi tokiyamo¹ene tamakai¹ena maigahie.

⁵ Maigahigi Anumayatimo¹a kaiyekema hulate-sia kanafina ani kanomo agu amena aligatisi-afene hutama menia Satani ayapi ateho. Satani¹a augafa¹age haesigeno age ha¹yema nehia yama¹a ha¹no hisigeno “Kefo ya nehue.” huno agu¹a aiyahae huno eteno eno.

“Kolini vaya¹mo¹ya kefo yama hisia kanoa anati-taleho.” huno humaine.

⁶ Tamakaya tamaugafama alitama nehaiya yana kanale ohunea kava nehae. Tamakaya ma yafena ohavinao? Ta¹nefaleti kai hame maya talo hageno osi kano¹amo halegisia yana maleteno alino havigu hinageno muki¹a ta¹nefafi ute ete hinageno haenaga muki¹a ta¹nefamo¹a halenegie. Anima hale negia avamete huno osi kefo ya kano¹amo¹agi muki¹a veapinaga ute ete hisigeno ala kefo yana ali falote hugahie.

⁷ Hugahigi kaihamema hale negia atafa yana kai hamepitila alitama haga¹yu hu ne¹atalaya avamete fatago kavake¹ya huta maisunafene hutama tamakaipitila kefo yana alitama haga¹yu hutaleho. Nayona vea¹mo¹ya kefo ya¹amihe havi¹ya sipi sipi hemainaya avamete huno Yisasi¹a tagayama fatago huta maisuna yafe fali-mainegeeta kefo yana ohisuna veala maisune.

⁸ Ani yafe nayona vea¹mo¹ya sipi sipia he¹ya muse humainaya avamete huta musena nehuta hale negia yana, vea ali haviya humatesuna

kava¹ene kefo ya¹ene ne¹ataleta fatago huta tole lagesa ohavita kelamage kege¹ya huta maisune.

⁹ Nago¹ma kae-malenoa avopina mage hu¹na humainoe “Kumai nehesaya vea¹nenena tokae-tama omaiho.” hu¹na kae-maleno.

¹⁰ Yisasi kema nohaviya vea¹mo¹ya kumai nehaya vea¹nene amakai¹ami¹aheke¹ya amakesa havi¹ya “Nagai¹ni¹a muki¹a yana alisue.” hu¹ya nehaya vea¹nene havige hu¹ya musufayama nehaya vea¹nene ago fali-mainaya veafe “Anumayati mainae.” hu¹ya amakisana ne¹vaiya vea¹nene muki¹a mopale mainayafe ani vea¹nene tokae-tama omaiho hu¹na hisugetama hanate haote yatela maisae? Yisasi kema nohaviya veafena mani kea ohunoe.

¹¹ Ohunogi nagaya Yisasina amaku¹a amitafa humainaya tamafu-tamakana¹ya kumai he kava¹ene agai¹ahe agesa havino “Muki¹a yana nagai ya hapaesie.” huno nehisia kava¹ene ago fali-mainaya veafe “Anumayati mainae.” hu¹ya amakisana ne¹vaiya kava¹ene vaya¹amihe hu-haviya humate kava¹ene havili ne¹ya aneginagi nehaya kava¹ene musufayama nehaya kava¹enema tamafu-tamakana¹yama hisagetama amakai¹enena ailokaetama maitama kavela oneho hu¹na hulokiya vai¹na avona kae-maleno.

¹²⁻¹³ Anumayamo akave nomalaya veala fako humatesia yana nagai ali¹yana omalegi Anumaya Koti¹a agai¹a ali¹yanagino kaiyekea humate-gahie. Tagai¹ene maine¹ya Yisasina amaku¹a amitafa humainesaya veala kanale¹ya hutama fako hutama “Kefo yana ohiho.” hutama

amaya hisaya ali'yatamia hanegeno Anumaya
Koti avopina mage huno kae-maleneane

“Tamakai'ene maineno kefo yama nehisia
kanomona henati-taleho.” huno kae-
maleneane.

6

*Yisasi anaga'mo'ya ne'amafugamina kaiyekea
hu o'matesae.*

¹ Nago'a nelamafu'yaene kema vaitetama
agai'ma kaiyekema hutegahena na'a higetama
Anumayamo kema akave nomalaya kava
vayatela amavaletama ne'vae? Ani kavala
ohiho. Yisasina amaku'a amitafa humainesaya
vayate vigeno ketamia alino kanale huno fatago
hulamateno.

² Yisasi anaga'mo'ya haenaga'a ma mopale
vea'mogamina kaiyekea humategahae hu'ya hu-
mainaya kea ohavinao? Muki'a veala kaiyekea
humategahagi osi kea fako hisaya tokiyatamia
hane hu'na nehue?

³ Tamakaya ohavinao? Haenaga'a tagaya en-
sole vaya'mogami kaiyekea humategahunagi ma
mopale yana osi yanagitama tamakaya afa'a fako
hugahae.

⁴ Nago yama falote hisia yupa kema fako
hugahena na'a higetama Anumayamo akave no-
male'ya mono nopi amaki omale vayatela kea
alitama ne'vae? Ani kava'ma hayana havi kava
nehae.

⁵ Tamakaipina tole nelamafugania kema
vaisa'ageno'a tamakaipina nagola kanale

havi havi'ya'a hanea kanoa amu'no'anifi hetino ke'anima fako hisia kanoa omaineo? Mainegahie. Tamakaye hisifa kea nehue.

⁶ Na'a higetama ani kanomotela anavaletama o'utama nelamafuganina kaiyekema hunategahena Anumayamo akave nomalaya kanomotela anavaletama ne'vae?

⁷ Ke vai yatamima falote higetama kaiyekema humategahe vayana havi kava nehae. Nago kanomo'a kagaila havi kava'ma hunegatesiana "Afa yane." nehuka kaiyekea hu o'ateka yuna heka maite'asina kanale hile'asine. Nago kanomo'a kagaipiti musufayama higeka "Afa yane." nehuka kaiyekea hu o'ateka maite'asina kanale hile'asine.

⁸ Kanale'ya hugahe hianagi ani kavala ohutama tamakaya havige hutama nelamafugamina havi kava hune'amatae.

⁹ Kefo yama nehaya veala Anumaya Koti'a kava yagai-mainea kumatela ohaigahae huno humainea kea ohavinao? Ani kehena havilama hutetama havige hisaya kea ohaviho. Ani kefo yama nehaya veala Anumaya Koti'a kava yagai-mainea kumatela ohaigahae moli hulite'ya nehu'ya kumai nehaya vea'nene ago fali-mainaya vayafe "Anumayati maine." hu'ya amakisana ne'vaiya vea'nene alu kanomo a'nema amavayu nehaya vaya'ene ve amafalu'yaene moli nehaya vaya'ene Anumaya Koti'ma kava yagai-mainea kumatela o'ugahae.

¹⁰ Musufa yama nehaya vea'nene alu kanomo yate'ma age hama'ye nehaya vea'nene havili

ne'ya aneginagi nehaya vea'nene nago'a veafe hu-haviya nehaya vea'nene havige hu'ya musufa yama nehaya vea'nene Anumaya Koti'ma kava yagai-mainea kumatela amaugosa tamage huno omalegahie.

¹¹ Tamakaila nago'atamimo'ya nayona ani avamete kefo ya nehageno Anumayatimo'a Yisasi Kalaisi agileti'ene Anumaya Koti Avamuteti'ene kefo yatamia ago aye ha'mi-talegetama alu aotage vea'ne maigeno Anumaya Koti aulina “Fatago vea'ne mainae.” huno alino kanale hulamatene.

Muki'a laugafa Anumaya Kotina noma'ae.

¹² “Muki'a yama hisuna kavala kahe-okineanagita afa'a hugahune.” hu'ya nehayanagi nagaya mage hu'na nehue “Muki'a yamo'a laya ohutafa huno laya ohugahie. Muki'a yana afa'a hugahuanagi ani yamo'a nofi hunate yafenagi'na nagaya ani kavala ohugahue.”

¹³ “Anumaya Koti'a kave nesunafene huno taipa talo huno nesuna kavala talo humale-
neanagita afa'a negahune.” hu'ya nehayanagi Anumaya Koti'a haenaga'a kave'ene taipaene alino fanane hugahie. Moli huliteta huta kumai hesunafene huno Anumaya Koti'a vea'mogati laugafa talo ohunegi Anumayamo'ene ailokaeta mainesunageno ani laugafa agai'a kava yagaisi-afene huno talo hulatenea yafe moli huliteta huta kumai he kavala ohisune.

14 Anumaya Koti'a tokiya'aleti Yisasina fali-mainefitila alino hetiteneanagino tagayama fal-isunageno'a ani'a huno alino hetilategahie.

15 Nagi ohavinao Kalaisi'enema mai hapaita mainonageno tagai taugafamo'a Kalaisi aiya, aya, aulaga, agha, kana huta mainone. Kalaisi augafa mainonagi hana'a huta Kalaisi augafa kumai nehaya a'nenena alita mai hapaisune? A'ao ani'a ohisune.

16 Anumaya Koti avopina mage huno kae-maleneane

“Alavema maina'ana nagoke anaugafa hane.”
huno kae-maleneane.

Na'a humaineanagi nago kanomo'a kumai nehea a'ene noma faeyana agai'ene mai hapai'ageno nagoke anaugafa kali-maina'e. Ani yafena ohavinao?

17 Nago anaugafa kali maina'anagi Anumayamo'ene mai hapaino mainea kanomo'a nagopi maine'ana nagoke anamete maina'e.

18 Nagi kumai heyafena kolia hutama ohutafa hiho. Muki'a kefo yamo'a amega amaugafale yanagi kumai he yamo'a alino vea amaugafafina haviya nehia yafena tusi'a koli hutama ani kavala ohutafa hiho.

19 Anumaya Koti'a agai'a Alu Aotage Avamu'a ago tamamigeno tamakupina maineafe tamau-gafamo'a Avamu'mona noma'a haneanagino tamaugafa tamakaitami yana omalene. Ani kea ohavinao?

20 Anumaya Koti'a ala miyateti tamakaila ago miya hulamateneafe tamaugafa kava yagaitama

kanale au'ava yake'ya hutama Anumaya Koti agia alisaga hiho.

7

Polo'a alavemogami au'avafe humaine.

¹ Avoma kaetama nahavigaya kea tamaha-paigahugi haviho. Nago kanomo'a a'nea ali o'atesiana kanale'ya huno maigahie.

² Maigahianagi amaugafa age hama'ye hu'ya kumai he yamo'a ala nehiafe muki'a vemo'ya a'ne'amia maitele hisige'ya a'nemo'ya ve'amia maitele hisie.

³ Alavemo'ya nehaya yana vemo'a a'amona "A'ao." hu o'ateno a'mo'a ani'a huno anau'amona "A'ao." hu o'atesie.

⁴ A'mo augafa agai'a augafa omalenegi anau'amo yagai-mainea augafa hane. Ani'a huno vemo augafa agai'a augafa omalenegi a'amo yagai-mainea augafa hane.

⁵ Na'a humaineafe vemoga akamo'ene humo kavafena "A'ao." hu o'ategeno a'moga anaukamo'ene humo kavafena "A'ao." hu o'ato. Nagote tokaetana mainetana tanakesa havitana "Osi kana kano'a humo kavala ohuta'a afa'a maineta'a nunamuna hugahu'e." hutana hisa'ana kanale hugahianagi muki'a kanafina ve alave humo kavala o'ataleho. Atalesa'ana Satani'a ayelana-vataga hinagetana alu vele'ene alu ate'ene age lanaha'ye hu yafenagi osi'a maigetana hi'o.

⁶ Mage hu'na nehua kea nagai'ni'a mani kea nehugi Anumaya Koti kahegi kea nohue.

7 Nagi nagai'nige maine'na a'ma o'alinoa yama hu'ya muki'a vayala maisaya yafe nena-haiyanagi Anumaya Koti'a agai'a alu'a lu'a mai yana nagoke nagoke'mogatina tamigeta tahaote tahaote au'avate nemaune.

8 Neya'vene muna'nene keto a'nenefe mani kea nehue nagayama a'ma o'ali'na mainoa avamete hu'ya maisayana kanale'ya hugahie.

9 Hugahigi age hama'yema hisaya yatela ya-gaisaya tokiya'amima omalesiana ata lamale-yafenagi a'nea alitesage'ya vea alisage'ya hisae.

10 Alavemogatama kahegi kea, nagai'nia nagesafitila nohugi Anumayamo humainea kea tamahapaigahue. A'nemogatama vetamia o'amataletama kanale'ya hutama maiho.

11 Maigahayanagi vetamima amataletama vin-utamahena alu velela omaiho. Afa'a omaisaya tamakesa hisigetama etetama vetamile etama nagoke tamaipale emaiho. Vemogatama atami-mona tamakaitamia hu o'amateho.

12 Nago'amogatamihena Anumayamo'a ohunea kea nagai'ni'a mage nehue. Yisasite ametiti humainesia kanomo'a Anumayamote ametiti nohisia a'mo'a neve'enema maisia agesama havisigeno'a neve'a "Nenataleka vuo." huno o'ataleno.

13 Yisasite ametiti hu-mainesia a'mo'a Anu-mayamote ametiti nohisia vele'ma mainesigeno ani vemo'a a'amo'ene maisia agesama hav-isigeno'a "Nenataleka vuo." huno nevena hu o'ateno.

14 Nagi Yisasite ametiti hu-mainesia a'mo'a Yisasite ametiti nohisia neve'enema maisiana ailokae'ana maisa'a yamo'a oni'ya'agela ohunegi ani vemo'a Anumaya Koti kema havisia yafe alu aotage kano maine. Yisasite ametiti hu-mainesia vemo'ma Yisasite ametiti nohisia a'enema maisiana ailokae'ana maisa'a yamo'a oni'ya'agela ohunegi ani a'mo'a Anumaya Koti kema havisia yafe alu aotage a'ne maine. Anumaya Koti aufima alu aotage veatalama omaisa'ana nafa'ne'amimo'ya ani'a hu'ya oni'ya'agela hale'asinagi tamage hu'ya Anumaya Koti kema havisaya yafe alu aotage nafa'neyaga maigahae.

15 Mainageno Yisasite ametiti nohia api vefi atalesayana afa'a atalegahae. Atalesayana Yisasite ametiti hunesia vea'nefi maina'a nofila ago aigalu hetalege'ya afa'a mainae. Anumaya Koti'a falu huta maisunafe ke higeta agaitega emainone.

16 Yisasite kametiti hu-mainana a'moga agai'ene maineka aya hisanageno anaukamo'a agu'a aiyahae hinageno Anumaya Koti'a agu amena aligatisio? huka kagaya ohavinane. Yisasite kametiti hu-mainana kanomoga akamo'ene maineka aya hisanageno akamo'a agu'a aiyahae hinageno Anumaya Koti'a agu amena aligatisio? huka kagaya ohavinane.

Anumaya Koti'ma hulatenea au'ava'mo avamete maisune.

17 Anumaya Koti'a muki'a veala noma maisaya yana fako huno amamineanagitama

muki'amogatama Anumayamo'a hapali-lamatenea yapi maiho. Mani kea Anumayamo anagala alule alule mo hamapai-mainogi haviho.

¹⁸ Anumayamo'ma hapalimatenea kanafina nago'a Yuta vaya'mo'ya amaugafa taga humalenaya amafugula hanege'ya ete'ya ani amafugula aye hanane'ya fala okisae. Nago'a vayamo'ya Anumaya Koti'a hapali-matenea kanaleti amaugafa taga ohunaya vaya'mo'ya menia laga ohisae.

¹⁹ Taugafa laga nehaya yano taga ohunaya yano ani tole yamo'a afa ya hanegi Anumaya Koti kema havita akave malesuna yana kanale yanagino aepa'a hane.

²⁰ Nagi muki'amogatama Anumaya Koti'a ago'ma hapali-lamatenea kanafina no maiyatamia o'ataletama nago'ene anile maiho.

²¹ Anumayamo'a hapali-lamatenea yupa nofipi mainetama miya o'alisaya ali'ya* ne'alitama mainageno ani ali'yana afa'a aliho. Aligahagi kava kanotamimo'a "Menia nofila huotamategahugi afa'a lamatalegahue." huno hisigetama muse nehutama afa'a ugahae.

²² Anumayamo'a hapali-lamatenea yupa nofipi mainetama miya o'alisaya ali'ya* ne'alitama Anumayatimo'ene ailokaetama mainayafe Anumayamo'a kefo yatamimo'ma alino nofi hulamatenefitila ago alino kalu he-taleneafe nofipina nago'ene omainae. Omainagi nago'a veala afa'a mainageno Anumayamo'a hapali-lamateneafe Kalaisi'a miyana o'alisia ali'ya vea'ne'a* tamage

hutama maigahae.

²³ Anumaya Koti'a ala miyateti miya hulamategetama agai vea'ne mainagi ma mopafi vea'mogami ali'ya vea'nea omaisae hu'na nehue.

²⁴ Nafu'nagana-gatama Anumayamo'ma hapali-lamatenea kanafina no maiyatamia o'ataletama nago'ene Anumaya Koti'a tamakai'ene mainesigetama "Hai mainone." hutama maiho.

Afa'a maine'ya vele'ma omai'ya a'ma o'alinaya vea'mogamife Polo'a humane.

²⁵ Anumaya Koti'a kalagi ainatege'na tamagege'ya hisua kanogi'na nago kea hugahe hue. Anumayamo'a mani kahegi kea ohunegi nagaya nagesafiti nehue. Vene ofaenesaya muna'nene a'nene ofaenesaya veyagahe nehue.

²⁶ Meni kanafina tusi'a kana yana falote nehiafe nagesa mage hu'na nehavue neya'vene muna'neyagaene mainaya avamete hutama maiho.

²⁷ Nagi a'ma ago alitenesana vemoga akamofena "Kataloe." huka hu o'ato. A'ma o'alinesana vemoga a'nea o'aliu hu'na nehue.

²⁸ Nehuanagi a'ma ali-tenukahena kefo yana omaleneanagika afa'a aligane. Vene ofaenesaya muna'nemo'ya vele maisayana kefo yana omalenegi ma mopafi mainesa'ageno tanakaipina kasago'ya kana yamo falote huyafenagi'na mani kea nehue.

²⁹ Nafu'nagana-gatama ma mopamo'a aupa kanafi ha'no hisia yafe meni kanaleti aepa

hetama a¹ma atenesia kanomo¹a a¹amofena
 agesa ohavino a¹ama omai kano kana huno
 maisie hu¹na nehue.

³⁰ Nago¹amo¹ya avima ne¹atesaya vea¹mo¹ya
 osi kano¹a avia ateho. Musema nehisaya
 vea¹mo¹ya osi kano¹a musena hiho.
 Afeno¹amima miya nehisaya vea¹mo¹ya o¹ali
 vea kana hu¹ya maiho.

³¹ Mama mainona mopa aupa kanafi fanane
 hugahigi mopafi ali¹yama ne¹alisaya vea¹mo¹ya
 mani mopale yafeke¹yana amakesa havi havi
 hu¹ya omaisae.

³² Ma mopale yafema tamakesa ku¹mo¹ma
 haya yafena nagaila nonahaiye.

A¹ma o¹alino mainea kanomo¹a Anumaya-
 mona haisia yafe¹ene ali¹yama¹aene agesa havi
 havi huno nemaiye.

³³ Nemaiyanagi a¹ama mainea kanomo¹a ma
 mopafi yafena, a¹amo¹a musema hisiafene agesa
 havi havi huno nemaiye.

³⁴ Nago kaiyaga Anumayamofena agesa
 nehavino nago agesamo¹a a¹amofena agesa
 nehavianagi keto a¹nene vele o¹unaya
 muna¹nene Anumayamo ali¹yafeke¹ya amakesa
 havi¹ya “Muki¹a taugafaene tagu¹aene
 Anumayamona alu aotage noma¹a hane.”
 hu¹ya kava yagai¹ya mainayanagi vele
 mainaya a¹nemo¹ya anau¹amimo¹ya musema
 humatesayafene hu¹ya mopafi yafe amakesa
 nehaviye.

³⁵ Mani kemo¹a katilelamatesua kea nohugi

tamaya hisuafe nehue. Kanale'ya hutama Anumayamofena tamakesa havi havi hutama nago yamo tamavayu huno atifi mafi ohisie hu'na nehue.

³⁶ Nago kanomo'a hage-malenesia a'amofena hageteno "Afa'a tokaeta'a omaigahu'e." huno huteno haenaga'a tusi ha'ye hisigeno "Kanale kavala hu no'atoe." huno haisia kava huno ani munala alitesie. Alitesiana kefo yana ohugahie.

³⁷ Nago neyamo'a agu'a amino hage-malenea a'amofena "Anumayamo ali'ya alisu'afe afa'a aote maigahu'e." huno agesa haviteno augafa age ha'ye hisia agu'aga hinageno kanale'ya huno kava yagaino "Afa'a aote maigahu'e." hisiana kanale kava hugahie.

³⁸ Ani yafe nago kanomo'a hage-malenesia a'ama alitesiana kanale kava nehianagi nago kanomo'a hage-malenesia a'ama ali o'atesiana tusi'a kanale kava hugahie.

³⁹ A'neyaga vele'ma faitesageno anau'amo'ma ofalino afa'a mainesigeno'a nagopi mai hapaino maineno a'mo'a ataleno alu vele o'visie. Anau'amo'ma falitesigeno'ma "Alu kanole maigahue." huno hisiana kanale hugahianagi Anumayamo'ene mai-lokaeno mainesia vea alisie.

⁴⁰ Aligahianagi nagaya nagesa havuana afa'ama maisiana tusi'a muse hugahie hu'na nehue. Manima hua kea Anumayamo Avamu'mo nahapaige'na nehue.

Afa yafe “Anumayati maine.” hu'ya amametiti nehaya yafe humane.

¹ Ago fali-mainaya vayafe “Anumayati maine.” hu'ya amakisana vai'ya afu ne'amamiya yamo kea nagaya hugahe nehue. Tagaya nago'a yafena havilinonanagi ani kanale havi'yatimo'a tamaugafa alita haisuna yanagi alu veafe tahau-tamayamopafi nelahaiya yana amaya huta ali tokiya vaimategahune.

² “Muki'a yana havilama hulinoe.” huno agesa havisia kanomo'a muki'a yafema havilama hisia himamu'a omaleneanagino ohavine.

³ Ohavinegi nago'a vea'mo'ya Anumaya Kotina amaku'a aminesaya veala Anumaya Koti'a amakaila ago amakelama humane.

⁴ Ago fali-mainaya veafe “Anumayati maine.” hu'ya amakisana vai'yama ne'amiya afuma nesaya yafe nehugi haviho. Tagaya havunana ago fali-mainaya vea'mo'ya ma mopafina tokiya'amia omalene. Anumaya Koti'a agai'age nagoke Anumaya maineanagi'ya kasago'ya Anumaya omainae.

⁵⁻⁶ Omainagi mopale'ene ikapinagaene afa anumaya kasago'yama mainale'asina tagaya tamage hute'asinagi “Nelafa'a agai'age Anumaya Koti'a maineno muki'a yana talo humalegeta mainone. Nagoke Anumayatimo'a Yisasi Kalaisi'a maineno muki'a yana talo huteno tagai'enena talo hulateneanagita agaiteti tahaimula ne'alune.”

⁷ Nago'a vea'mo'ya mani kea ohavine'ya “Afa

anumayayaga tamage hu'ya mainae.” hu'ya nehae. Nago'a vea'mo'ya Yisasife havi'ya amakupi malayanagi amaku'amo'a tokiya'agela ohuneafe ani afa anumayamoma aminaya afua nene'ya mage nehae “Afa anumayamo kave nenonageno ani kave'mo'a tagu'amona alino haviya higeno oni'ya'age nehie.” hu'ya amakesa havimainae.

⁸ Nehaviyanagi kave'mo'a Anumaya Koti avatela tavaleno otategahie. Ani afuma onesunana Anumaya Koti aufina havi veala omaigahunagi nesunana Anumaya Koti aufina kanale vea'nea omaigahune.

⁹ “Afa'a anumayamogami amamiya afua negahune.” hutama hisaya yafena ka'yeho. Havigu Yisasifena amaku'amo'a tokiya o'vainesia vea'mo'ya agete'ya nesayana “Kefo ya nehune.” hu'ya havigu asaga hulaviyafenagi ka'yeho.

¹⁰ “Afa'a anumayayaga tamage hu'ya omainae.” hutama havimainaya vea'mogatama anima afa anumayamo amiya afuma malenesaya nopi mo nenesageno nagola Yisasifena agu'amo'a tokiya o'vainesia kanomo'a tamaketeno “Negahue.” huno hu yafenagi ka'ye ho.

¹¹ Ani yafe tamakaya “Havilama humainone.” hutama nehaya yatamimo'a, nago'ma agu'amo'a tokiya o'vainea nelamafufe huno Kalaisi'a falimaineanagitama tamakaya avaletama havi kate atesageno ali haviya huyafenagi ka'ye ho.

¹² Ani yafe agu'amo'a tokiya o'vainesia nelamafuna kefo ya hutesageno tokiya'a omalesia

agu nafa'nea agata aisia havi kava huteyafenagi ka'ye ho. Tamafu-tamakanana kefo ya'ma hutesayana Kalaisi'ene kefo yana hune'atae.

¹³ Ani yafe kavela nenoanagi'na nafu'naganana havigu neteno havi kapi asaga hulavino visia yafenagi'na nagai'enena nago'ene afua onegahue. Havigu nafu'nagana'a kefo yapi uyafenagi'na ani kavala ohugahue.

9

Polo'a Yisasi ali'yama aliana miyama o'aline a yafena muse humaine.

¹ Nago kanomo'a "Na'a ohuo." huno natafa nehio? A'ao natafa nohie. Aposolo kanoa maino? E, ani kano mainoe. Nagaya Anumayatimo Yisasina agemaino? E, tamage Anumayamo'ene ailokae'na maine'na agai ali'ya alimainoa ali'yateti lamakaya tamaku'a aiyahae nehae.

² Nago'a vea'mo'ya nagai'fena mage nehae "Aposolo kanoa omaine." hu'ya nehayanagi Yisasi kema tamahapaugetama havitama tamaku'a aiyahae hage'ya vea'mo'ya nelamake'ya nagai'fena "Anumayamo'ene ailokaeno Aposolo kanoa maine." hu'ya nehae.

³ Nago'a vea'mo'ya au'ava'ni'ama fako hisage'na nagaya mage hu'na hugahue.

⁴ "Anumayamo ali'yana ne'aluanagi'na kave'ene ti'enena afa'a alisuo?"

⁵ Nago'a Aposolo vaya'ene Yisasi agana'amo'yaene Pita'ene nehaya kava hu'na

Yisasima agu'a aminesia a'ma alitene'na avale'na vaiyesuana ani yamo'a havi kava hugahio?

⁶ Panapasi'ene ta'agaiti'age Anumayamo ali'yana ne'alita'a ta'agaiti'a moneleti kavela miya huta'a neno'e. Na'a higetama ta'aya nohae?

⁷ Nagi ati vayala kamele ugahena amakai'ami mone'amileti kave'amia kena'amia miya nehao? A'ao. Hana kanomo hoya vai-maleteno ani hoyafitila kavela alino onene? Hana kanomo pulumaka kava yagaiteno haenaga'a nutima'a onene? Ani kavala ohugahagi afa'a ali'ya negahae.”

⁸ Veamo'ya nehaya kavake'ya akave male'na mani kea nehoo? A'ao, Anumaya Koti avopi'ene ani kea huno kae-maleneane.

⁹ Mosese kahegi kefina mage huno kae-maleneane

“Pulumakamo'a ali'yama'a ne'alino vitimo avina ayeno hagage huno onesie hutama avayalela nofila okinegeno ali'yana ne'alino kavela neno.” huno kae-maleneane.

Mani kea Anumaya Koti'a pulumakamofe humaineo?

¹⁰ A'ao, tagaife humaine. Nagi hoyama alino humalenea kanomo'a kave nesia yafena agesa haviteno negafie. Hoyafiti'ma nena humainesia kave'ma ne'alisia kanomo'enena “Ali'yati'aleti kavela nagopi maineta'a negahu'e.” hu'ana ali'yana ne'ali'e.

11 Nagaya Anumayamo kea huhale'na tamahapaite'na Avamu'mo avina yana hoyafina kali-malenogi ani hoyamo'ma nena hisige'nahena tamakaipitila kena'niene kave'niene kanalelagi'na alisuo ifi o'alisue?

12 Nago'a vaya'mo'ya tamakaipitila ne'aligi nagaya amakase-mainoa yafena tamakaipitila alisuo o'alisuana? Kanalelagi'na aligahuanagi havigu Yisasi Kalaisi kanale mono kema havisaya katamia kahea ki'otamatesuafene hu'na kavela o'ali'na maine'na muki'a kana yana aluanagi “Kavela namiho.” hu'na nohue.

13 Mono nopi ali'ya ne'aliya vaya'mo'ya ani nopiti kave'amia ne'aliye. Anumayamofe havi'ya sipi sipi he'ya kae-salamana nehaya ali'ya vaya'mo'ya ani sipi sipifiti kave'amia ali-mainae. Ani kea ohavinao?

14 Na'ama hayana Yisasi kanale mono kema hamanepaiya vayafena Anumayamo'a mage humaineane “Mono ketamima havisaya vea'mo'ya anona'a kenatamia kavetamia tamamisae.” huno humaineane.

15 Humaineanagi nagaya “Namiho.” hu'na ohunananagi menia “Namiho.” hu'na mani avona nokaove. Yisasi kema tamahapauvana tamakaipitila kavela afa'a o'alinoa yafena muse nehua yani'a haneafe ago faligahema husina kavefena tamahavigesua nagesa ohavusine.

16 Yisasi kanale mono kema huhale'na nehuafenagi'na nagai'ni naugafa ali'na ohaigahue. Anumaya Koti'a “Na'a huo.” huno tokiya'age ke huno hunatege'na huhale'na

nehue. Ohule'asina Anumaya Koti'a muse ohigeno kana yana namile'asine.

¹⁷ Nagaya nagesafiti ani ali'yana no'alugi Anumayamo hunatege'na mani ali'yama alua yafena miya yani'a o'aligahue.

¹⁸ Anumayamo'a hunatege'na huhale'na nehua ali'yana afa'a ne'aluanagi'na monema onamisaya yafena naipamo'a kanale nehie. Huhale'na nehua yatetila miyani'a alisua amuko'nia haneanagi o'alisua yatetila muse yani'a hane.

Polo'a muki'a vea'mogami ali'ya kano maine.

¹⁹ Monema o'alua yafena nago'a vea'mogami ali'ya kano'amia omainogi muki'a vea'mo'ya amaku'a aiyahae hisayafene hu'na ali'ya kano'amia mainoe.

²⁰ Yuta vea'mo'ya Yisasi akave hisaya yafe amakai'ami nehaya kava hu'na maine'na Yisasi kea hamane'pauve. Kahegi kema havi'na akave malesugeno'a Anumayamo'a "Fatago kano mainane." huno hunategahie hu'na nohugi ani kema akave nemalaya veala Yisasi akave hisae hu'na amakai'ene maine'na mani kemo akave male'na Yisasi kea hamane'pauve.

²¹ Kahegi kema ohavinaya vea'nene maine'na Yisasi akave hisae hu'na amakaya haya avamete hu'na Yisasi kea hamane'pauve. Anumaya Koti kahegi kea akave male'na Kalaisi akave nehu'na agai kea havi'na akave nemaloe.

²² Yisasife havi'ya tokiya vaisaya amaku'a omalenesia vea'nene maine'na amaku'a ali

lokiya vaimatesuafe tokiya nagu hanea kano omainoe. Nago¹a vea¹mogami amaku amamena aligatisua yafe aluya hu¹na amakai¹amima amahaote amahaote nehaya kava hu¹na Yisasi kea hamanepauve.

²³ Na¹a nehisuge¹ya kasago¹ya vea¹mo¹ya Yisasi hulatenea kanale mono kea havitesage¹na amakai¹ene kanale¹ya hu¹na maine¹na musena hisue hu¹na nehue.

Tagaya taiyage taiyage huta uva¹yi huo huno humainele uva¹yi huta anona¹a alisune.

²⁴ Ohavinao o¹agase a¹agase hu¹ya amakasaya vea¹mo¹ya ne¹aliya yana nagoke kanomo¹a amakaseno agai¹age muse yana aligahie. Ani kava hutama tamaiyage tamaiyage nehigeno Anumayamo¹a anona¹a tamamino.

²⁵ Ani yokaloma nelaya vea¹mo¹ya aluya hu¹ya amaku amakesalela tokiya vai¹ya kava ne¹yagaiye. Muse hisaya yama anona¹amia alisaya yafe kava yagai¹ya mainageno amakasesia kanomo¹a konagali yana aligahianagi ani yamo¹a fanane hugahie. Fanane hugahianagi tagaya fanane ohisia kanale yana anonatia alisunafene huta tagu tagesalela tokiya vaita ne¹yagaune.

²⁶ Ani yama alisua yafena naiyayege naiyayege nehu¹na amakasesuafene hu¹na faitega moge mege nohue. Nayateti¹ene amakasesua yokaloa nele¹na nagaya faitega mo ai me ai nohugi nayatetila vaya amaugafale sili hu¹na amaikonelue.

27 “Fatago kate viho.” hu'na vea'ma hamane'paisuletila havigu nagaya havi kate visugeno Anumaya Koti'a nagaila akave'no hunatesige'na kanale anona'nia o'alisuafene hu'na tusiya hu'na “Naugafamo age ha'ye hia yana ohugahue.” hu'na nagu nagesale kava yagai'na mainoe.

10

Havigu ayelavataga hisia yapi asaga hu lavi-sunagi ka'yeta maisune.

1-2 Nafu'nagana-gatama Yuta taginagomogamifena tamakesa havisae hu'na nehue. Mosese akave'ma umainayana nago sia'mo'a muki'a aiso humateneno kana amavelige'ya kanale'ya hu'ya vayana muki'amo'ya Haesa tina lakae-mainayafe Mosese'ene ailokae'ya maine'ya siateti'ene hage liteti'ene tima fale neamataya avame kavala humane.

3-4 Muki'amo'ya ti omale kotega umaine'ya nagoke ikapinagati kave'ene yafapiti falote hia alu aotage ti'ene ne-mainae. Ne-mainagi ani yafana Kalaisi'e. Agaya maineno amakai'ene vaiyatete humane.

5 Muki'amo'ya nayanagi kasago'ya vea'mo'ya Anumaya Koti kea akave omalageno Anumaya Koti'a musena hu o'amateno amatalege'ya nago'a veala falige'ya amaugafa ka'me kopi atalageno mopagopi haneme humane.

⁶ Na¹ama humainaya kavala tagaiti hula-
makesa hisunafe hu-mainayanagita amakaya hu-
mainaya avamete huta age laha¹ye nehuna
kavala ohisune.

⁷ Nago¹a vea¹mo¹ya afa anumaya, amayateti
talo humalet¹ya amaku¹a amite¹ya Anumaya
Koti kea atalenayane. Tagaya ani kavala
ohisunafe Anumayamo avopina mage huno
kae-maleneane

“Afa anumayamofena muse hu¹ya kave¹ene
ti¹ene nete¹ya amoa aye¹ya a¹nene yokaloe
lemainae.” huno avopina kae-maleneane.

⁸ Nago¹a vea¹mo¹ya kumai haya yateti nagoke
yupa tueti tali tauseni¹a (23,000) vea¹ne fali ha¹no
humainae. Na¹a humainayafe tagaya kumai
kavala ohisune.

⁹ Anumayamofe “Ma kava huo.” hu¹ya ayevataga
hayafe osifa¹vemo¹ya hamae ha¹no hage¹ya fali-
mainagi ani¹a huta Anumayamona ayevataga
ohisune.

¹⁰ Nago¹a vea¹mo¹ya “Anumayamo¹a havi kava
nehie.” hu¹ya kalu kalu ke hutageno ensole
kanomo¹a nago¹a veala me hamaege¹ya fali-
mainayane. Tamakaya Anumayamofena kalu
kalu kea vaio¹ateho.

¹¹ Muki¹a anima falote humainea yana ageteta
fatago huta maisunafene huno Anumaya Koti¹a
avopina kae-maleneane. Tagaya menima main-
ona kanafina mopamo¹a aup¹a¹a fanane hugahe
nehiafe mani kea haviteta kefo yana ohisunafene
huno kae-maleneane.

¹² Na¹a humaineafe “Kanale¹ya huta heti-
mainone.” hutama nehisaya vea¹mogatama hav-

igu asaga hu laviyafenagi yagaitama maiho.

¹³ Yagaitama mainesageno kana yano “Havi yama hiho.” huno¹ma ayelamavataga hisia yano falote hisiana ani yana tamakaitamige ayelamavataga nohigi muki¹a veala ani¹a huno ayemavataga nehie. Na¹a nehianagi Anumaya Koti¹a huno tokiya vaino humalenea kele tole aghesa ohavinegi ani kele akave maleno tamaya hugahie. Ayelamavataga hisigetama “Tokiya¹nia omalene.” hutama hugahe hageno tokiya vaitama maisayafe Anumaya Koti¹a tusiya huno tamaya huno “Haegafa katela male viho.” huno tamave-ligahie.

Anumaya Kotite¹ene Kefo Avamute¹ene tolemogani anakia alisaka ohiho.

¹⁴ Nahau-mainea nafu¹nagana-gatama ago falimainaya vea¹mogamife “Anumayati maine.” hutama amakisana ne¹vaiya yana ohiho. Anumaya Kotifeke¹ya muse huteho.

¹⁵ Tamakaya tamaku tamakesaene vea¹ne mainagi tamahapaisua kea havitama ali fako hiho.

¹⁶ “Kalaisi¹a tagai kefo yafene huno falimaine.” huta tagesa havi havi hisuna yafe nofi alagamo tina, Kalaisi kolanagita alita Anumayamotega muse hutama nonana Kalaisi kolana tokaeta nenone. “Kalaisi¹a augafa agata aimainea yamo kefo yatia ago alitalene.” huta maya alita aposita nenona yamo Kalaisi augafa tokaeta nenone.

¹⁷ Nagoke maya haneanagi muki¹a vea¹mogata nagoke mayafiti aposita nenonafe tagaya nagoke

vea¹ne nagoke kanomo augafa kana huta mainone.

¹⁸ Tamakaya tamakesa haviho Yuta vea¹moya Anumaya Kotitega sipi sipi he¹ya kae-salamana hete¹ya tokae¹ya anifiti ali¹ya nete¹ya Anumayamo¹ene nagopi ailokae¹ya mainayane.

¹⁹ Manima hua kemo aepa¹a haviho. Ago fali-mainaya veafe “Anumayati maine.” hu¹ya afu he¹ya amakisana vai¹ya amamiya yamo¹a afa kava humainae. Anima fali-mainaya vea¹mogamina tokiya¹amia omalene.

²⁰ Tokiya¹amia omalenegi nagaya tamanepauve Yisasi kema nohaviya vea¹mo¹ya Kefo Avamu¹mo kavela malenagi Anumaya Koti kavela omalenayane. Kefo Avamu¹ene ailokaetama omaisae hu¹na nehue. Ani kavela oneho.

²¹ Havigu tamakaya “Kalaisi¹a tagai kefo yafe huno fali-maine.” hutama Anumayamo kapufiti nenetama Kefo Avamu¹mogami ne¹amamiya tina mo neyafenagi ani kavala tamage hutama ohiho. Havigu tamakaya Anumayamo kave nenetama Kefo Avamu¹mogami amamiya kave¹ene neyafenagi ani kavala ohiho.

²² “Ani kava nehisunageno Anumaya Koti aipamo¹a haviya hisie hutama nehao? Ifi tagai tokiyamo¹a agai tokiya agase-maine.” hutama nehao? A¹ao, na¹a kavala ohune.

Muki¹a kanafina Anumaya Koti agi alisaga hisune.

²³ Nago¹a vea¹mo¹ya mage hu¹ya nehae “Muki¹a hisuna kavala kahe okineanagita afa¹a

hugahune.” hu'ya nehayanagi ani muki'a yamo'a taya ohugahie hu'na nehue. Muki'a kavala kahe okineanagita afa'a hugahunanagi muki'a ani yamo'a Yisasife havita tametiti humainona yamona alilokiya vai o'ategahie.

²⁴ Tagaiti laugafa ha'maesia yafekela tagesa ohavisune. A'ao, alu vea'mogami yafe tagesa havita amaya hisune.

²⁵ Maketifiti afumo ame'a miya hugahema vinutamahena “Kefo Avamu'ma amaminaya afuo? Nesunana haviya hulatesio?” hutama tamaku'afinaga havioketama afa'a miya hutama neho.

²⁶ Anumayamo avopina mage huno kae-maleneane
 “Ma mopaene muki'a mopafi hanea ya'enena
 Anumayamo yama'age hane.” huno hu-
 maineane.

²⁷ Yisasi kema nohavisaya vea'mo'ya “Etama kavala me neho.” hu'ya hisagetama vinutamahena tamakesa ohavitama tamamisaya kavala afa'a neho. Havigu tamaku'amo'a “Havi kava nehae.” huno hisagetama havioketama afa'a neho.

²⁸⁻²⁹ Negahayanagi nago kanomo'a “Ma kavala Kefo Avamu'mo kae-salamana hutaya kavele.” huno hisigetamahena afa'a onetama ataleho. Tamakai tamaku'amo'a “Havi ya nehae.” huno hisia yafe'ene kahanepaiya kanomo agu'a ali haviya huyafenagi ani kavala oneho.

Ani kave nesuana nago kanomo agu'a ali haviya hu-yafenagi'na nagaya ani kavala nesuo

ifi onesue?

³⁰ Nagaya ani kavela Anumayamotega muse hute'na nesuana na'a hinageno nago kanomo'a nagaya anima muse hute'na noa yafena “Havi kavala nehane.” huno kea nenamake?

³¹ Kave nesao ali'ya alisao muki'a yama hinutamahena Anumayamo agia alisaga hisaya yafeke hiho.

³² Yuta vealo, Yuta vea omainaya vealo, Yisasife havi'ya amakupi malenaya vealo, muki'a vea'mogami amaufina kanale kavake'ya hiho. Havigu havi kava hisageno ani kefo yamo'a amaiyafi ako'ya yamo ayea kava hinage'ya asaga hu-lavisagi.

³³ Nagaya muki'a kava'ma nehuana nagai nahaisia yafe nagesa ohavi'na muki'a Anumaya Koti'a vea'mogamina amaku amamena aligatisi-afene hu'na hamaisifa kava nehue.

11

¹ Nagaya Polo'nae Kalaisi'ma humainea kava hu'na akave nehugi nagaila nenagetama nagayama nehua kavake'ya nakave hutama maiho.

Mono nopima a'nemo'ya amanute aiso hisaya yafe humaine.

² Kahegi male'na tamahapaugetama tamakela okanitama kanale kava hutama akave nemalayafe “Kanale kava nehae.” hu'na musena hu nelamatoe.

³ Ma ma hisua kea havilama hiho. Anumaya Koti'a Yisasina ala kano'a maiteno agenopa maigeno Yisasife havi'ya amakupi malenaya

vea'mogamina ala kano'amia Yisasi'a maiteno amakenopa'amia maige'ya ani'a hu'ya vemo'ya a'ne'amimogamina ala kano'amia maite'ya amakenopa'amia mainae.

4 Nago'a vaya'mo'ya Anumaya Koti kema huhale'ya nehu'yao nunamuma nehu'yao amanutela aiso ohisae*. Aiso hisayana Yisasina, amakenopamona agaye hisifa kava hune'atae.

5 Hune'atagi nago'a a'nemo'ya Anumaya Koti kema huhale'ya nehu'yao nunamuma nehu'yao hinu'ya amanutela nago yatetila aiso ohisayana* amakenopamo'a, anau'amimona agaye hisifa kava hu'ya amayolagefa muki'a laga hu-talenaya a'nemo'ya* nehaya augafa kava nehae.

6 Nago'a a'nemo'ya amanute'ma aiso ohisayana afa'a amayolagefa muki'a laga hu-alesae*. Tagama hu'ya aupa hisaya yamo'a amakaye hisifa kava'ma hanesige'ya ne'atale'ya amanutela aiso hisae.

7 Vemo'ya Anumaya Kotina amema'a "Anumayamo agi alisaga hisae." huno vemogamina talo hu-maleneafe amanutela aiso ohisagi a'nemo'ya anau'amimogami amaki alisaga hisayafe amanutela aiso hisae.

8 Anumaya Koti'a a'nemogami amaugafaleti vene'nea talo ohunegi vemogami amaugafaleti a'nea talo humalene.

9 Anumaya Koti'a a'nehe "Ha'mao." huno vene'nea talo ohunegi vehe "Ha'maesia yane." huno a'nea talo hu-maleneane.

10 Talo hu-maleneae yafe'ene ensole vaya'mo'ya ne'agaya yafe'ene a'nemo'ya "Anautimo

amaiya'afi nemaune.” hu'ya amanutela aiso hulisa'e hu'na nehue.

¹¹ Nehuanagi Anumayamo'ene ailokaetama maisayana a'mo'a haotela agai'agela omaisie. Vemo'a ani'a huno haotela omaisie. Agaila aya nehisiana agaila aya nehisiana hutana maisa'e.

¹² Hagoteno vefiti a'nea ali falote hige'ya mainayanagi menia a'nemo'ya vene'nea ne'amatayanagi Anumaya Kotipiti muki'a yamo'a falote hu-maineafe aepa'a maine.

¹³ Tamakaya tamakaitami haya kavala fako hutama ageho. A'nemo'ya amanutela aiso ohune'ya nunamuma hisayana kanale nehio?

¹⁴ Tamakaitami haya yamo'a tamaveli-maine vemo'ya amayolagefa ku'ma hanesiana amakaye hisaya yana hane.

¹⁵ Haneanagi “A'nemogami amayolagefa kula muse hisaya konagali ya'ami hane.” hutama nehae. Anumaya Koti'a amanute aiso hisaya yafe amayolagefa kula amamine.

¹⁶ Nago'a vea'mo'ya ani yafema kema vaisayana ani kenona'amihe mani kea nehue nagai'ene muki'a Yisasife havita tagupi malenona vea'nene alu au'ava kavala nohunagi nagoke kavake'ya nehune hu'na nehue.

Kolini vea'mo'ya Anumayamo kave'ma negahena fatago au'ava kavala nohae.

¹⁷ Menima tamahapaisua kea haviho tamakaya havi kava nehage'na havi'na musena hu no-tamatoe. Yisasi agima alisaga hugahe melitalu

hutama maifina kanale kavala nohagi havi kava nehage¹na nagai¹nia onahaiye hu¹na nehue.

¹⁸ Nago¹a vea¹mo¹ya nahapaiyana tamakaya Yisasife havitama melitalu hutama maifina ke ne¹vaitama tolefi ali fako nehae hu¹ya hayana tamage hu¹ya nehao? E, tamage nehae hu¹na nagesa nehavue.

¹⁹ Tamakai¹ene mainaya veapina nago¹a veala fatago hu¹ya Anumaya Kotina haiya kavala nehae. Ani veala agetama falote hisaya yafe tolefi ali fako nehae hu¹na nehue.

²⁰ Anumayamo kave¹ma negahe melitalu hayanagi tolefima ali fako haya yatamia haneafe Anumayamo kave lama nonae.

²¹ Ani kave¹ma negahema melitalu hayana nago¹a veafena amakava nohagi tamahaote tamakaitami alitama aya kavela nenage¹ya nago¹a veala amakala nelege¹ya nago¹a vea¹mo¹ya nofi alagamo tina ne ha¹no hute¹ya anegi vaya kana hu¹ya nemaiye. Na¹a havi kava nehutama Anumayamo kave¹mona aepa¹a havilama ohutama afa¹a nena.

²² Na¹a higetama na¹a kavala nehae? Kave¹ma lima nesaya notamia omaleo? Netetama eho. Anumaya Kotife havi¹ya amakupi malenaya veafena “Afa vea kana nehae.” hutama nehutama kave¹amima omalea veafena “Afa vea kana nehae.” hutama amakaye hisifa kavala nehao? Ani kava¹ma hayana “Kanale kava nehae.” hu¹na hisuo? A¹ao “Tusi¹a havi kava nehae.” hu¹na nehue.

Yisasi¹a kai hame mayaene nofi alagamo

tima'ae ne anaga'amogamina amamine.

²³⁻²⁴ Anumayamotegati ali-mainoa kegi'na ago tamahapai-mainoa kemo'a ma'a humaine Yutasi'a Yisasina agesi huno avaleno kame vaya amayapi atenea kegela Alatimo'a Yisasi'a kai hame kana maya alino Anumayamotega muse huno nunamu huteno aposino ne'amamino mage huno hie “Mamona nagai'ni naugafae. Tamakai tamaya hisiafene hu'na naugafa haki'na nelamamugi nagai'fena tamakesa havi havi nehutama nete nete hume hume haiho.” huno hamapaiye.

²⁵ Hige'ya ani kavela netageno ani'a huno nofi alagamo ke'ayola alino mage hie “Nagai kolama laki lavisia kanafina Anumaya Koti'a haegafa alino hagelafi lamatesia kea ali fatago hisia yana havisaya yafe muki'a kanafina mani ke'ayopiti nofi alagamo tina nenetama nagai'fena tamakesa havi havi hutama maiho.

²⁶ Ani mayaene nofi alagamo ti'ene nene-tamahena Anumayatimo'a tagaife huno fali-mainea aepa'a huhaletama hugahae. Ani'a hume ne'visageno Anumayatimo'a eteno esie.”

Tagaitia tagu'amona fako huta ageteta Anumayamo kavela nesune.

²⁷ Nago'a vea'mo'ya kai hame kana mayaene nofi alagamo tife'lenena amaku'a fakoa ohu'ya afa'a nesayana Anumayamo augafaene kolama'aene alihaviya nehae. Anumayamo aafina kefo au'ava kava nehae.

²⁸ Ani yafe muki¹a vea¹mogatama Anumayamo mayaene nofi alagamo ti¹ene nenutamahena hagotetama tamahaote tamahaote tamaku¹a fako hutama agetetama “Kefo yana humaino?” hutama tamakesa havitetama tamaku¹amo¹ma kanale hu-mainesigetamahena neho.

²⁹ Nago¹a vea¹mo¹ya kai hame mayaene nofi alagamo ti¹ene nene¹ya Yisasi¹ma tagaife huno augafa hakino fali-mainea aepa¹ahema ohavi¹ya afa¹a nenesaya vea¹mogamina Anumaya Koti¹a kaiyekea humateno anona¹amia amamigahie.

³⁰ Na¹a kava¹ma humainea yafenagi¹ya tamakaipitila nago¹a veala amaugafamo¹a fulu fulu hige¹ya kalia alige¹ya nago¹a veala ago fali-mainae.

³¹ Tagaya hagoteta tagu¹a havita ali fako huteta note¹asina Anumaya Koti¹a kaiyekea hulateno anona¹a otamile¹asine.

³² Anumayamo¹a haenaga agai kema nohaviya vea¹ma kaiyekea humateno anona¹a amamisia kavala tagaila otamisiafe menia tagaya kefo yama nehunageno¹a fako hulateno mai fatago huta maisunafe ka¹yona nelamie.

³³ Nafu¹nagana-gatama na¹a humaineafe Anumayamo kave¹ma negahena melitalu hutetama kanale¹ya hutama nago¹a veafena amakava mainege¹ya muki¹amo¹ya esagetama nagopi tamako¹ya aye-mainetama ani kavela neho.

³⁴ Havigu kefo yama nehutama Anumayamo kave¹ma nesayana Anumaya Koti¹a kaiyeke hulamateno fako hulamateyafenagi nago¹a

vea'mogamima tusi'a amakatesige'yahena no'amifinagati nete'ya esae. Nago'a kea haneanagi'na tamakaitegama esua kanafina tamahapaigahue.

12

Alu Aotage Avamu'mo'a alu'a lu'a tokiya nelamia yafe humane.

¹ Nafu'nagana-gatama menia Alu Aotage Avamu'mo'a tokiya ne'amamia ke havisae hu'na nehue.

² Nayona Yisasi kema ohavinaya kanafina Satani'a tamavayu higetama agea o'aino ago falimainaya veafena "Anumayati mainae." hutama amakisana ne'vaitama havi kate umainaya yafena tamakaya ago havilinae.

³ Anumaya Koti Avamu'mo'a nago kanomo agu'afima mainesigeno'a mani kea ohugahie "Anumaya Koti'a Yisasife hai vaiteno hani yapi maiyo huno hutesie." huno Yisasina hu-haviya hu o'ategahie. Nago kanomona Alu Aotage Avamu'ma agupi omainesia kanomo'a "Yisasi'a Alani'amo maine." huno ohugahie.

⁴ Anumayamo ali'ya aligahe alu'a lu'a muse yamo tokiya nelamianagi nagoke Alu Aotage Avamu'mo nelamie.

⁵ Anumayamo ali'yana alu'a lu'a ali'ya hanegeta ne'alunanagi nagoke Anumaya maine.

⁶ Mainegi alu'a lu'a ali'ya alisuna tokiyatia hanegeta ne'alunagi nagoke Anumaya Koti'a

ali'yama'a alisuna tokiya nelamianagino agai'a ali'yana ne'alie.

⁷ Muki'a vea'ne amaya hisunafe Avamu'mo'a tokiya'a tave-nelino tahaote tahaote tamine.

⁸ Alu Aotage Avamu'mo'a nago'a vea'mogamina Anumaya Kotina agu agesaene kea hamapaisia tokiya amamiteno nago'a vea'mogamina falaki-mainea kemo aepa'a havisaya amaku amakesa amamine.

⁹ Ani Avamu'moke'ya nago'a vea'mogamina Anumayamofe havi'ya tokiya'age amametiti hisaya amaku'a ne'amamino nago'a vea'mogamina kalima ne'aliya vea'ne ali'ya kanale humatesaya tokiya nagoke Avamu'moke'ya amamine.

¹⁰ Nago'a vea'mogamina tokiya'age avame yama hisaya tokiya ne'amamino nago'a vea'mogamina Anumayamo kea amakupinaga humainea kea huhale'ya hisaya tokiya amamine. Nago'a vea'mogamina havilama hu'ya fako hisaya tokiya amamige'ya "Mani kavala Anumayamo Avamu'mo nehio? Vea'mo'ya amaku amakesafiti nehao? Kefo Avamu'mo nehio?" hu'ya havisaya tokiya amamine. Nago'a vea'mogamina nohaviya kefiti alu amake alu amakefiti hisaya tokiya amamine. Ani kemona aepa'a hu yahae hu'ya hisaya tokiya nago'a vea'mogamina amamine.

¹¹ Haote haote tokiya nagoke Avamu'moke'ya tamine. Agai'a haiya kava huno tahaote tahaote alu lokiya alu lokiya fako huno lamine.

Tagaya muki'amogata nagoke augafamo augafa atupa-tapa'a mainone.

12 Taugafafitila taiya, tayana, taulaga aote aote haneanagi taugafa nagoke yane. Ani'a huta Kalaisife havita lagupi malenona veala alu vea'ne alu vea'ne mainonanagi muki'a veala Kalaisina nagoke augafa mainone.

13 Nagoke Avamu'mo'a tina falelamatea kava huno nagoke augafale alino aika'maelategeta Yuta vea omainaya vea'nene, Yuta vea'nene, nofipi maine'ya mone o'ali ali'ya vea'nene, miya'amima alisaya ali'ya ne'aliya vea'nene alino aiga'maelategeta nagoke taugafa mainonageno nagoke Avamu'mona timo'ma hia kava huno ani li nesunafe nelamie.

14 Taugafa nagoke yama'agela omalegi taugafafitila taiya, tayana, taulaga hane.

15 Aiyamo'a "Nagaya ayana omainoafe mani augafafiti kanoa omainoe." huno'ma hisiana havige afa'a ani augafafiti kano maine.

16 Agesamo'a "Aulaga omainoafe mani augafafiti kanoa omainoe." huno hisiana havige afa'a ani augafafiti kano hane.

17 Muki'a augafafima aulaga'age'ma hanele'asina hana'a huno agesa havile'asine? Muki'a augafafima agesama hanele'asina hana'a huno mana havile'asine?

18 Na'a ohunegi Anumaya Koti'a agesa haviteno agai'a haiya kava huno taulaga, taiya, tayana talo hulateteno aote aote yana nagoke taugafafina alino malete malete higeno hane.

19 Nagoke yama'age'ma hanesina muki'a laugafa omalesine.

20 Alu tupa-tapama alino talo higeno'a taiya, tayana haneanagi nagoke taugafale hane.

21 Aulagamo'a ayafena “Kagayama omaite'asina nagaya kanale'ya hu'na maule'asine.” huno ohugahie. Anumo'a aiyahena “Kagayama omaite'asina nagaya kanale'ya hu'na mausine.” huno ohugahie.

22 Na'a ohugahigi nago kaiyaga taugafamofema “Tokiya'a omalene.” huta nehunanagi ani kaiyaga taugafamo'a tusi'a ali'yama'a hane.

23 Nago kaiyaga taugafamofena “Afa ya kana humaine.” huta ali hilato hune'atonanagi tagaye hisuna kaiyaga falakita kena fai ne'alune.

24 Fai ne'alunagi kanale'ma humainea kaiyagatia afa'a kena nofaunagi Anumaya Koti'a agai'a agesa haviteno muki'a laugafa talo humaleteno afa ya kana huno haviya humainea taugafamo kaiyaga kanale'ya huno agia alisaga nehie.

25 Muki'a laugafamo'ya ali fako ohisayafe ani kavala humalegeno “Nagoke taugafa hane.” nehuta nago avamete maineta kava yagai-mainone.

26 Nago kaiyaga taugafamo'a tagatama aiyana muki'a laugafamo'a tagata ne'aiye. Nago kaiyaga taugafamo'a ala agima aligeno'a muki'a taugafamo'a muse nehie.

27 Lamakaya muki'a Yisasina augafa aiya, aya, aulaga'a mainae.

28 Yisasife havita lagupi malenona vea'mogatama nagopima maunana alu ali'ya alu ali'yana Anumaya Koti'a agai'a huyogino lamine. Hagoteno Aposolo vayala humateteno anile Anumayamo amakupi humainea kema huhale'ya hisaya veala humateteno anile Anumaya Koti ke huge amavelige hisaya veala humateteno anile tokiya avame yama hisaya veala humateteno anile kali vea ali hetimatesaya veala humateteno anile vea amaya hisaya veala humateteno anile kava veala humateteno anile amakesamo'a nohavia kefiti hisaya vea'nene alino hetimatene.

29 Muki'a vaya'mogata Aposolo vaya mainao? Ifi muki'a vea'mogata Anumayamo amakupi humainea kea huhaletama hisaya vea mainao? Ifi muki'a vea'mogata huge amavelige ali'yana ne'aliyo? Ifi muki'a vea'mogata tokiya'age avame yana nehao?

30 Ifi muki'a vea'mogata kalima aliya veala ali kanale hune'amatao? Ifi muki'a vea'mogata tagesamo'a ohavinea kefitila nehao? Ifi muki'a vea'mogata ani amakema aiya kea hu yahae hutama nehao?

31 A'ao na'a nohunagi tamakaya Avamu'mo uhagote hanea muse yana alisayafe tokiya'age huno tamahaisie hu'na nehue.

Tagaya nago'a veala taipa amamisune.

Menia nagaya nago yamo'a lamage huno uhagote hanea au'avafe tamahapaigahe hugi haviho.

13

¹ Nagaya nohavua kefiti hu'na mopale vea'mogami amakene Ensole vaya amakene aisuanagi vea'mogamife nahau nayamopafi onahaisige'na yave'yaene velo'ene afa'a aiko nelugeno kema ayeso nehia avamete hu'na afa kegefa nehue.

² Anumayamo'a avayafiti nahapaiya kea huhale'na nehu'na Anumaya Koti'a falaki-malenea kemona aepa'a muki'a havilama humainoanagi veafe nahau nayamopafi onahaisiana afa ya kana hu'na mainoe. Anumayamofena havi'na nametitia hute'na “Ago'yamoga alule vuo.” hisugeno ani ago'yamo'a nagai ke havino visianagi veafena nahau nayamopafi onahaisiana afa ya kana hu'na mainoe.

³ Veafema nahau nayamopafi onahaisige'na mone afeno'ami omalenesia vea'ne muki'a yani'a amamisuana ani yamo'a naya ohugahie. Veafema nahau nayamopafi onahaisige'na Anumayamo kema huhale'na nehisuge'ya hamai vainate'ya navale'ya atafi natalesageno naugafa leno asagalisia yamo'a naya ohugahie.

⁴ Veafe hamau amayamopafi nehamaiya vea'mo'ya haviyama humatesage'ya mailava hu'ya maine'ya anona'amia huo'amate'ya kayone'age vea'ne mainae. Alu kanomo yate age hama'ye hu'ya amaipamo'a haviyana ohige'ya amaugafa ali'ya ohai vea'ne mainae.

⁵ Amakai'ami amakia alisaga hu'ya

veganokanola nohae. Amakai'ami yafekela amakesa havi havi nohae. Aupa'a hamaiya no'vaiye. Havi kava'ma humataya veafena amakesa ohavi'ya afa'a ne'atalae.

⁶ Veafe hamau amayamopafi nehamaiya vea'mo'ya nago kanomo'a kefo yama hisia yafena muse ohugahagi tamage kelefe musena hugahae.

⁷ Veafe hamau amayamopafi nehamaiya vea'mo'ya haviya humatesaya vea'mogamina o'amatalegahagi Anumayamo amaya hisiafe amametiti nehu'ya agava maine'ya mai lokiya vai'ya nemaiye.

⁸ Ma ma hamau amayamopafima nehamaiya yana hanege hanege huno hanegahianagi Anumayamo amakupi humainea kema huhale'ya hamapaiya kemo'a ha'no hugahie. Amakesamo'a nohaviya kema nehaya yamo'a ha'no hugahie. Falaki-mainea kemo aepa'ama havilama nehaya yamo'a fanane hugahianagi hamau amayamopafi nehamaiya yana agola ha'no ohugahie.

⁹ Ha'no ohugahigi havimainona yamo'a nago kaiyaga'a havilama ohunone. Anumayamo'a lagupi humainea kea huhaleta nehunanagi nago kaiyaga'a havilama ohunone.

¹⁰ Havilama ohunonagi fatago kavake'ya nehisia kanomo'a, Yisasi'a, muki'a yafena havilama hulineanagino esigeta havilama ohuneta nehuna yamo'a fanane hugahie.

¹¹ Nagaya osi nafa'nema mainoa kanafina

nafa'nemo'ma nehia kea nehu'na nagesa havi havi humainoanagi ko hute'na ala kanoma mauvana nafa'nemo'ya nehaya kavala ago ataleno.

¹² Meni kanafina tagaya haniko'mako yapi maineta Anumaya Koti augosa galasifima tamema agona avamete kava nehuta agelama huta no'agonanagi haenaga'a Anumayamo augosa ne'ageta agelama hugahune. Meni kanafina Anumayamo kea havilama nohunanagi Anumayamo'a nagaila nagelama humainea kava hu'na haenaga'a nagaya agaila agelama hugahue.

¹³ Anumayamofe havita lagupi maleta tametitima humainona ya'ene "Anumayamo'a hulamategahue huno humainea yana hugahie." huta lametiti nehuna ya'ene veafe tahau tayamopafi nelahaiya kava'ene ani tagufa (3) yamo'a hanege hanege huno hanegahianagi tahau tayamopafi nelahaiya yamo'a uhagoteno mani tole yamona agaseno tama yatafa hane.

14

Anumayamo kea huhaletama hisaya yafena tusiya huno tamahaino.

¹ Hagotetama veafena tusiya huno tamahau tamayamopafi tamahaino. Anile Alu Aotage Avamu'mo lamamisia tokiya alisaya yafe musena nehutama tusiya huno tamahaino. Ani tokiya yapiti hagotetama Anumayamo'a tamakupima humainea kema huhaletama hisaya tokiyahena tusiya huno tamahaino.

² Amakesamo'a nohavia kema hisia kanomo'a veala hamanopaigi Anumaya Kotina agai'age hanepaiye. Vea'mo'ya ani kea nohavigi falaki-mainea kea Avamu'mo hapaigeno humaine.

³ Humainegi Anumaya Koti'a amakupi humainea kema huhale'ya nehaya vea'mo'ya nago'amogami amametitia ali lokiya vaimatesaya kene amaya hisaya kene huhale'ya humatenae.

⁴ Nohaviya kefiti nehaya vea'mo'ya amakai'ami amaku'amo tokiya vaisia yana ne'amianagi Anumayamo'a amakupi humainea kema huhale'ya hisaya vea'mo'ya Yisasife havi'ya mono nopi melitalu nehaya vea'mogamina amaya nehae.

⁵ Muki'a veala amakesamo'a nohaviya kefiti hisage'nahena muse hugahe huanagi muki'a veala Anumaya Koti'a tamakupi humainea kema huhaletama hisage'na aluya hu'na musena hugahue. Anumayamo kema huhaleno nehisia kanomo'a agesamo'a nohavia kefiti nehisia kanomona agase-maineanagi ani kea hu yahae hisige'ya Yisasife havi'ya melitalu humainesaya vea'mo'ya havisageno hama'maeno amametitia ali lokiya vaigahie.

⁶ Ani yafe nafu'nagana-gatama tamakaya mainesalega uva'yi hu'na ohavinesua kefiti'ma tamahapaisugetama ohavisayana ani kemo'a tamaya ohugahianagi Anumayamo aepa'a havilama hu'na mani kene Anumayamo'a falaki-malenea kene Anumayamo'a nagupi humainea

kene huge hamave-lige hu'na huhale'na hisugeno ani kemo'a tamaya hugahie.

⁷ Nagi vea'mo'ya kepiti'ene otofiti'ene yagamema hufatago hu'ya ohisayana vea'mo'ya havilama hu'ya ohavigahae.

⁸ Nago kumate'ma tuma hugahe keha kehama hisage'ya havilama ohisaya kema hisayana vaya'mo'ya hana'a hu'ya havite'ya kamea hugahae?

⁹ Tamakaya ani'a humainae tamakesamo'ma ohavinesia kema hisage'ya hana'a hu'ya ani kea havigahae? Ani kemo'a yasimo'ma hia kava huno fanane hugahie.

¹⁰ Ma mopafi vea'mo'ya alu amake alu amake ne'aiyanagi muki'a ani kemo'a afa yana omalegi ani kema nehaviya vea'mogami aepa'aene ke hane.

¹¹ Haneanagi nago kanomo'a alu kefiti, nohavisua kema hisige'na "Ohavua ke nehianagi'na ani kanoenena tokae'na omaigahue." hu'na hugahue.

¹² Tamakaya Anumayamo ali'yama aligahena Avamu'mo'a tokiya'ama tamamisia yafena aluya huno'ma tamahaisiana Yisasife havi'ya amakupi malenaya veala amaya hutama ali lokiya vaimatesaya ali'yamo tokiyaheke'ya aluya huno tamahaisie.

¹³ Ani yafema ohavinesia kefiti'ma hisia kanomo'a ani kea hu yahae hisia tokiya alisia yafena Anumayamotega havigesie.

¹⁴ Nagesamo'a ohavinesia kefiti Anumayamotega havigesuana ani kea nagesamo'a

nohavianagi nagu nafa'nemoke ani kea huno havinege.

¹⁵ Ani yafena na'ane hisue? Nagesamo'a nohavia kefiti nagu nafa'nemo'a Anumayamotega havigege'na nagai'ni'a havua nagesaene Anumayamotega havigegahue. Mono yagamea nagesamo'a nohavia kefiti nagu nafa'nemo'a hugahianagino nagai'ni'a nagesa havimainoa mono yagamene hugahue.

¹⁶ Ani'a ohisanana kagu nafa'nemoke kagesamo'a nohavia kefitila Anumayamo agia alisaga hisige'ya nago'a ani yafema ohavinesaya vea'mo'ya kema hana kea nohaviyafe hana'a hu'ya “Tamage nehie.” hu'ya Anumayamo agia alisaga hugahae?

¹⁷ Kagaya Anumayamofe muse huka kanale'ya huka agia alisaga nehananagi amakaya ohavisyana amaku'a ali lokiya vai no'amatane.

¹⁸ Nagaya muki'a veala amakase'na nohavua kefitila tusiya hu'na nehua yafena Anumayamofena muse nehue.

¹⁹ Muse nehuanagi Yisasife havi'ya mono nopi melitalu hisafina huhale'na hisugetama havilama hisae hu'na tagaiti kefitila faefu'a (5) ke kano'a osi'a tamahapaisuana teni tauseni'a (10,000) kema nagesamo'a nohavisia kefiti hisua kemona agasegahie hu'na nehavue.

²⁰ Nafu'nagana-gatama kefo yama hisaya yafena nute nafa'nemo'ya nehaviya amakesamo avamete hu havitama maiho hu'na nehuanagi alopa vea'mo'ya nehaviya amaku amakesamo

avamete havitama kanale¹ya hutama ma ma Alu Aotage Avamu¹mo¹a tokiyama tamamisia kema tamahapauva kea fako hutama nafa¹nemo¹ya nehaviya avamete tamaku tamakesa ohaviho.

²¹ Anumayamo¹a mage hige¹ya avopina kae-malenayane

“Yuta veafe nayona mage hu¹na humainoane ‘Nagai¹ni veafe alu vea¹mogami kefiti hamapaisuanagi ani¹a hu¹ya veganokano nehu¹ya nagai kea havi¹ya akave omalegahae.’ huno humainayane.”

²² Na¹a humaineafe ohavinesia kefiti nehisage¹ya Yisasina amakave¹no hutenaya vea¹mo¹ya havi¹ya Anumaya Kotina tokiya avame yama¹a ne¹age¹ya “Anumayamo kea tamage nehie.” hu¹ya hisayafe amave-lianagi Yisasife havi¹ya amakupi malenaya veafe ani avame kea nohigi Anumaya Koti¹a avayafiti humainea kema huhale¹ya nehageno amaya nehie.

²³ Yisasife havi¹ya melitalu hisafina muki¹a vea¹mo¹ya nohavisaya kefiti kema hisage¹ya ani kava¹ma o¹agenesaya vealo Yisasina amakave¹no hutenaya vealo me havisayana hinage¹ya “Havigunagu kava nehae.” hu¹ya hugahae.

²⁴ Hugahagi muki¹a vea¹mo¹ya Anumayamo¹a amakupi humainea kema huhale¹ya nehisage¹ya ani kava¹ma o¹agenesaya vealo Yisasina amakave¹no hutenesaya vealo hainefale¹ya havinu¹ya Yisasife huhale¹ya hisaya keleti amakai¹ami “Kefo ya nehune.” hu¹ya hisageno

hisaya kemo¹a amakaila kaiyeke humateteno fako humategahie.

²⁵ Fako hamaisige¹ya amakupima falaki-mainesia yana falote hisige¹ya agete¹ya Anumaya Kotite ape hu¹ya Anumaya Koti agia alisaga nehu¹ya “Anumaya Koti¹a tamakai¹ene maine.” hu¹ya hugahae.

Muki¹a Anumayamo agima alisaga hisuna au¹ava kavala fatago kavake¹ya hisune.

²⁶ Nafu¹nagana-gatama na¹a hisaya yafena na¹ane hisune? Melitalu hisayana nago vea¹mo¹ya yagamea hisage¹ya nago vea¹mo¹ya Anumaya Koti kea hisae. Nago vea¹mo¹ya Anumayamo falaki-malenea kea agupi hapaiya kea huhaleno hisayana nago vea¹mo¹ya Avamu¹mo aminea kea agesamo¹a nohavia kefiti nehisageno nago vea¹mo¹ya ani kea hu¹ya aiyahae hisae. Ani kavake¹ya hutama veala amaku¹a ali lokiya vaisaya kea hiho.

²⁷ Nago¹a vea¹mo¹ya amakesamo¹a nohaviya kefiti¹ma hinu¹yahena tolemoganio tagufa vea¹mo¹yao amahaote amahaote hisage¹ya nago¹a vea¹mo¹ya ani kea aiyahae hiho.

²⁸ Ani kema aiyahae hisia kanoma omainesige¹ya mono nopina ani kea ohu¹ya amakupinaga Anumayamofena ani kea hisae.

²⁹ Tolemoganio tagufa vea¹mo¹yao Anumaya Koti¹a amakupi humainea kea huhale¹ya hisage¹ya nago¹a vea¹mo¹ya ani kehena amakesa havi havi hu¹ya fako hu¹ya haviho.

³⁰ Nago kanomo'a Anumaya Koti kea huhaleno nehisisigeno Anumayamo'a nago kanomona agupi kea nehisisigeno'a hagote kanomo'a kea ohuno mainesigeno anile kanomo'a kea hisie.

³¹ Muki'a vea amaya hisage'ya havi'ya kanale'ya hu'ya mai-lokiya vaisayafe muki'amogatama tamahaote tamahaote Anumaya Koti'a tamakupi kea higetama huhaletama hiho.

³² Anumayamo'a amakupi humainea kema huhale'ya hisaya vea'mo'ya mani kea hisaya yafe'ene ohisaya yafe'ene amakai'ami amaku'ale kava yagai'ya mainae.

³³ Anumaya Koti'a haviya havaya hisaya kavafena nohaigi ako hutama maisaya yafe nehaiye.

Muki'a Yisasife havi'ya melitalu nehaya vea'mogami ani kava nehae.

³⁴ A'nemo'ya mono nopina kea ohu'ya ako hu'ya maiho. Kahegi kema akave male'ya anau'amimo amaiyafinaga maine'ya mono nopina ke havi'ya nago kea ohu'ya maiho.

³⁵ Nago kemo'a kanama hamaisige'ya no'amifinaga umaine'ya anau'amimona ani kehena hamavigesae. A'nemo'ya mono nopina kea hisayana amakaye hisia kava hugahae.

³⁶ Yisasi kanale mono kea hagoteno tamakaipiti falote humaineo? A'ao ani'a ohune. "Tagaitige havimainone." hutama nehao? A'ao ani ke-mofena veganokanola ohiho.

³⁷ Nago kanomo'a "Anumayamo'a nagupi

kea hige¹na huhale¹na hisua kano mainogeno Avamu¹mo tokiya namige¹na mainoe.” huno hisia kanomo¹a ma ma kae-malenoa kemona “Anumayamo kahegi kehe humaine.” huno hise.

³⁸ Manima hua kema amakave¹no hutesaya vea¹mogami kea ohaviho.

³⁹ Nafu¹nagana-gatama Anumayamo kea huhaletama hisaya tokiyahe aluya huno lamahaigahianagi amakesamo¹a nohavia kefiti¹ma hisaya veafena “A¹ao.” hu o¹amateho.

⁴⁰ Muki¹a kava¹ma mono nopima melitalu hutama nehaya kavala kaliso o¹atitama fatago hutama hisaya kavake¹ya hiho.

15

Kalaisi¹a ago fali-mainefiti eteno heti-maine.

¹ Nafu¹nagana-gatama Yisasi¹a hulatenea kanale mono kema huhale¹na tamahapai-mainoa kea nago¹ene hu¹na tamakesa ali hao hugahe nehue. Mani kea havitama tamakupi maletama tamametiti hutetama ago hetitama mainae

² Ani kanale kea atafa hulinesageno Anumayamo¹a tamaku tamamena aligatigahianagi afa¹a amega tamaugafaleti¹ma “Yisasifena nagu¹a aminoe.” hutama hisayana tamaku tamamena aliokatigahie.

³ Anumayamo¹a nahapaige¹na havimainoa kemo¹a uhagoteno agase-mainea kea mage hu¹na tamahapai-mainoe Anumayamo avopi kae-malenea kate Kalaisi¹a kefo yama humainona yatefene huno fali-maine.

⁴ Falige¹ya hevaitageno tole yupa komufinaga hanetegenog tagufa (3) kanale avopima kae-malenea kate maleno Anumaya Koti¹a avale hetimaine.

⁵ Eteno hetiteno Pita aule eva¹yi huteno haenaga¹a agai¹a aleveni¹a (11) anagatela va¹yi humaine.

⁶ Va¹yi hige¹ya faefu hataleti¹a (500) alitalu humainaya tafu-taganate eva¹yi humaine. Ani veala osi¹a falitageno kasago¹ya veala ofali¹ya afa¹a mainae.

⁷ Anile Yemesi mainele eva¹yi huteno haenaga¹a muki¹a Aposolo vayatela eva¹yi hige¹ya age-mainae.

⁸⁻⁹ Na¹a huteno haenagalafa nagaitela eva¹yi humaine. Kalaisina akave nehaya veala nagaya tusiya hu¹na ali haviya humatenoafe Aposolo kano maisua yafena onatenegi muki¹a Aposolo vayala nagaila nagasege¹na osi vaya kana hu¹na maige¹na a¹mo¹a kana¹a omalegeno nafa¹ne atea kava huno Anumaya Koti¹a agai¹a nafa¹ne nategeno Kalaisi¹a faliteno nagaitela eva¹yi humaine.

¹⁰ Anumaya Koti¹a agai¹a kayone yama¹a namineafe Aposolo kanoa mainoe. Kayone yama¹a naya hige¹na nago¹a Aposolo vaya¹mo¹ya ali¹yama ali-mainaya ali¹yana amakase¹na ne¹aluanagi nagaya omagi Anumaya Koti kayone yama¹amo naya higeno nagai¹ene haneafe alimainoa ali¹yamo¹a amakase-mainae.

¹¹ Nago¹a Aposolo vaya¹mo¹yao nagayao tamahapauna kea lagaya muki¹amogata nagoke

kege¹ya huhaleta humainona kele havitama tamakupina malenae.

Haenaga¹a muki¹a fali-mainaya veala hetigahae.

¹² “Kalaisi¹a ago fali-mainefiti heti-mainae.” huta nehunagi na¹a higetama nago¹a vea¹mogatama “Fali-mainaya veala ete¹ya heotigahae.” hutama nehae?

¹³⁻¹⁴ Fali-mainaya vea¹ma he-otinale¹asine Anumayamo¹a Kalaisi¹enena fali-mainefitila ali heti-o¹atele¹asine. Kalaisina fali-mainefiti¹ma ali heti-o¹atele¹asina nagayama nehua kea afa ke kana higetama tamakaya afa yafe tamakupina maletama tamametitia hale¹asine.

¹⁵ Anumaya Koti¹a Kalaisina alino heti-o¹atenesina tagaya “Anumaya Koti¹a Kalaisina alino hetitene.” huta nehuna kemo¹a Anumaya Kotife havige hute¹asine. Anumaya Koti¹a fali-mainaya vea¹ma alino heti-o¹amatele¹asina Kalaisi¹enena alino heti-o¹atenele¹asine.

¹⁶ Tamage Anumaya Koti¹a vea¹ma fali-mainafiti ali heti-omatenele¹asina Kalaisi¹enena ani¹a huno alino heti-o¹atenele¹asine.

¹⁷ Nagi Anumayamo¹a Kalaisima ali heti-o¹atenesina tamakupi maletama tamameti nehaya yamo¹a afa ya kana higeno kefo yama nehaya yatamimo¹a aigagilamateno lamatafa hile¹asine.

¹⁸ Kalaisife havi¹ya amakupi malet¹ya fali-mainaya vea¹mo¹ya hani¹mo agu¹afi agola amakata aiya no maile¹asine.

19 Kalaisife havita tagupi malona yana ma mopale mainona kanafike¹ya taya hile¹asina haenaga faliteta hetita ikapinaga ohaute¹asina Kalaisife havita lakupi malenona yamo¹a afa ya kana hule¹asinagi haenagama va¹yima hisia yafe tamage huta lametitia nehune.

20 Tamage Anumayamo¹a Kalaisina fali-mainefiti ago alino hetiteneane. Hoyafi kave¹mo¹ma hagoteno nena hia avamete huno Kalaisina hagoteno ali hetiteneanagino haenaga¹a fali-mainaya veala alino hetimategahie.

21 Nagoke kanomo¹a, Atamu, kefo yama humainea yateti fali yana ali falote humaineanagi nagoke kanomo¹a, Kalaisi¹a, fali-mainea yateti ani¹a huno tagaya vea¹mogata heti yana ali falote humaine.

22 Ma¹a humaine Atamu muki¹a nelafa maineafe muki¹amogata agayama humainea kava huta nefalunanagi Kalaisi¹enema aiga¹maeta mainona vea¹mogata agayama humainea kava huta eteta hetita haegafa vea¹ne maigahune.

23 Anumaya Koti¹a malenea kana¹ale Kalaisi¹a hagoteno heti-maineafe agayama eteno esia yupa muki¹a Kalaisife havi¹ya amakupi malenaya vea¹mo¹ya fali-mainesafiti hetigahae.

24 Hetitesageno ani kanafi muki¹a yana ha¹no hisigeno Kalaisi¹a muki¹a ma mopale kava vaya¹ene Anumaya Koti kame vaya¹aene Kefo yamo tokiyama hanea Avamu¹yagaene Kalaisi¹a amakaseno ani vaya¹mogamina ali ha¹no

humaleteno Anumaya Kotina kava yagaisiafe Nefa ayapi muki'a amategahie.

²⁵ Kalaisi'a yagaime yagaime haino muki'a kame vaya'a amakaseno aiyafinaga alino amategahie.

²⁶ Kalaisi'a kame yana ali ha'no humaleteno haenagalafa vea'ma nefaluna yana heno fanane hutalegahie.

²⁷ “Kava yagaisiafe muki'a yana Anumaya Koti'a Yisasi aiyafi malene.” huno kae-maleneane. Mani kea “Muki'a yana malene.” huno humainea kea Anumaya Koti'a, kava yagaisiafe muki'a yana Yisasi aiyafi malenea kanomofe ohune.

²⁸ Ani kavala humaleteno muki'a yana agaseno kava yagai-mainea kano Kalaisina, Anumaya Koti'a aiya'afi ateteno Anumaya Koti'a muki'amo'ya hagote kava kano maigahie.

²⁹ Yisasi'a fali-mainefitila heotinele'asina nago'a vea'mo'ya fali-mainaya veafena amakesa havi'ya mono tima nefalayana na kanale ya falote hugahie? Fali-mainaya veala heotisayana na'a hinage'ya fali-mainaya veafena havi'ya tina nefalae?

³⁰ Tagaya Anumaya Koti kea huhaleta nehunage'ya muki'a kanafina ka'yo kevea lamigeta falisuna kavala nehune. Vea'ma heotisayana na'a higeta ani hu nelataya kavala afa'a ne'alune?

³¹ Nafu'nagana-gatama tamagelafa nehue muki'a kanafina ka'yo keve namige'na faligahe huanagi Yisasi Kalaisi Anumayatimo'ene

ailokae'na maine'na agai kema tamahapauge-tama havimainaya yafena aluya hu'na musena nehue.

³² Ma mopafi yafeke'ya nagesa nehavi'na Efesusi kumate mainaya vayala, kave'age afela afu kana nehaya vaya'ene keleti tua nehuanagi'ya fali-mainesaya vea'ma heotisyana ani kava'ma hunenataya yamo anona'a hana'a hu'na alisue? Falimainesaya veala heotisyana vea'mo'ya nehaya kea “Ega falisupi afa'a maineta ti'ene kave'ene neta kanale'ya huta maigahune.” hu'ya nehaya kemona akave malegetao.

³³ Havigema nehaya vea'mogami kea ohaviho. Fatago vea'mo'ya kefo yama nehaya vea'nene maisayana ali haviya hulamategahagi ka'yetama maiho.

³⁴ Tamakesa hao hinagetama kefo yama nehaya yana ataleho. Nago'amogatama Anumaya Kotifema ohaviya yafena tamakaye hino hu'na nehue.

Faliteta hetisuna taugafa haote ya kana hugahie.

³⁵ Nago'a vea'mogatama mage hutama nahavi-negae “Hana'a hu'ya fali-mainesaya veala hetigahae? Fali-mainesaya vea'ma hetisyana hana augafa amaugafa hanesige'ya eva'yi hugahae?” hutama nahavi-negae.

³⁶ Nahavi-negaya vea'mogatama havigu ke nehae. Avina yama mopafi fai-malenageno falino numayu ohisigeno'a ohagegahie.

37 Hageno va'yi higetamahena fai-malenaya avina kana ohunegi osi avina alaga kano'a viti avinafi alu avina yapi osi kano'a fai-nemalae

38 Fai-malenageno Anumaya Koti'a agesa haviteno haiya kava huno avina yana alu augafa alu augafa amigeno nehage. Anima nehagea avamete huno Anumaya Koti'a fali-mainesaya veala alu amaugafa amamiteno ali hetimategahie.

39 Muki'a yamona nagoke augafa okaline. Veala alu laugafa kali-maigeno afu kalamogamina alu amaugafa kali-maigeno namayaga-mona alu amaugafa kali-maigeno noyameyaga alu amaugafa kali-maine.

40 Ikapinaga yana alu amaugafa kali-mainegi ma mopafi veala alu amaugafa kali-maine. Mopale veala konagali ya'amia haneanagi ikapinaga veala alu'a konagali ya'ami hane.

41 Yagemo'a alu konagali yama'a hanegeno ikamo'a alu konagali yama'a hane. Ka'nefi'yagamona alu konagali yama'a haneanagi nago'a ka'nefi'mona alu konagali yama'a haneanagi nago'a ka'nefi'mo'ya alu konagali ya'ami'a hane.

42 Fali-mainaya veala falige'ya hevaimataya amaugafa kasalisia amaugafa haneanagi ete'ya hetisaya amaugafa agola hanege hanege huno fanane ohisia amaugafa hanegahie.

43 Hevaimatesaya amaugafa amakaye hisia amaugafa haneanagi ete'ya fali-mainesafiti hetisayana tokiya hale yama'a hanesia

amaugafaene hetigahae. Hevaimatesaya amaugafamona tokiya¹a omalenea amaugafa haneanagi ete¹ya hetisaya kanafina tokiya¹a hanesia amaugafaene hetigahae.

⁴⁴ Hevaimatesaya amaugafa mopa amaugafa hanegenno hetisaya amaugafa ikapinaga amaugafa falote hugahie. Mopale maisuna taugafama hanesiana ikapinaga maisuna taugafaene falote hugahie.

⁴⁵ Na¹a humainea yafe Anumaya Koti avopina mage huno kae-maleneane

“Hagote kanoa, Atamu¹e, haimula hanea kano falote humaine.” huno kae-maleneane.

Kae-maleneanagi haenagama falote humainea Atamu¹a, Yisasi¹e, ikapinaga maige maige hisaya hamaimula amamisia kano maine.

⁴⁶ Hagoteno ikapinaga maisuna taugafa falote ohunegi mopale taugafa hagoteno falote huteno haenaga ikapinaga maisuna taugafa falote hugahie.

⁴⁷ Hagote kanoa, Atamuna, mopaleti aye kakalifeno talo huteneanagino haenaga falote humainea kanoa, Yisasi¹a ikapinagati emaine.

⁴⁸ Mopale mainaya veala mopaleti talo humalenea kanomo avamete hu¹ya mainagi ikapinagama visaya veala ikapinagati emainea kanomo avamete hu¹ya maigahae.

⁴⁹ Menia mopaleti talo humalenea kanomo augafa kali-mai vea¹ne mainonanagi haenaga¹a ikapinagati emainea kanomo augafa kali-mai taugafa hanegahie.

⁵⁰ Nafu¹nagana-gatama tamahanepauve

mopafi taugafamo¹a Anumaya Koti kava yagai-
mainea kumatela o¹ugahianagino kasalino
fanane hisia taugafamo¹a agola maige maige
nehaya kumatela o¹utafa huno o¹ugahie.

⁵¹ Anumaya Koti kema falakino hanea kea
tamahapaigahugi haviho. Muki¹a Yisasife
havi¹ya amakupi malenaya vea¹mogata
ofalita afa¹a mainesunageno aupa¹a muki¹a
laugafamo¹a alino alu¹a hu taugafa hapaegahie.

⁵² Aupa¹a aulumaya ko¹nelia au¹ava kava huno
haenagalafa kepiti ufe kalafa kemo¹a nehigeno
Yisasi¹a ikapinatila efalote hisigeno ago¹ma
fali-mainaya veala hetite¹ya agola maige maige
hisaya amaugafa alitesageta ofalita afa¹a maine-
suna veala anile maige maige hisuna taugafa
hapaegahie.

⁵³ Mopafima mainona taugafamo¹a
negasalianagi haenaga¹a okasalisia taugafa falote
hugahie. Falisuna taugafa haneanagi haenaga¹a
ofalita agola maige maige hisuna taugafa falote
hugahie.

⁵⁴⁻⁵⁵ Negasalia taugafamo¹a fanane hutenageno
okasalisia taugafa falote hugahie. Fali yamo¹a
fanane hinageno ofalisuna yana falote hisigeno
ma ma Anumaya Koti humainea kemo¹a
falote huno tamage hugahie. Mage huno kae-
maleneane

“Maige maige hisuna yamo¹a falisuna yamona
agasetafa humaine. Nefaluna yamoga
tagasesana tokiyaka¹a hanate hane? Fali
yamoga veala amaugafa akafu anika hene-

falina tokiyaka'a hanate hane?" huno kae-maleneane.

⁵⁶ Kahegi kea akave omalonafe kefo yana nehune. Kefo yama nehuna yana akafu amanino vea'ne hefalisia ya hane.

⁵⁷ Haneanagi Anumayati Yisasi Kalaisi'a hulate-nea yamo falisuna yana ago agase-maineafe Anumaya Koti agia alisaga huta muse hisune.

⁵⁸ Nahau-mainea nafu'nagana-gatama Yisasi-fena tamaku'a ami hetofa hutama mai-lokiya waitama etetama alu katela o'viho. Anumaya Koti ali'yamo'a afa ya kana ohuno kanale anona'a alisaya ali'ya haneafenagitama muki'a kanafina Anumayamo ali'yana tokiya'age waitama aliho.

16

Polo'a "Mone alitalu hige'na malanageno Yelusalemu vino." huno humaine.

¹ Yisasi anagala Yelusalemua mainage'na amaya hisaya mone amamisaya kea hugahe hue. Kalesia kotega mainaya vea'mogamina hamapauge'ya humainaya kavala tamakaya ani'a hiho.

² Nagaya esua kanafina ani monema alitalu hisaya yafena nonahaigi Sotama'ahe Sotama'ahe alisaya monea ali fako hutama alu vaya amamisaya monea alitalu hute hute hiho.

³ Ani kava nehage'na esua yupa tamahaisia vayala hapalisage'na avo kae'na amamite'na humatesuge'ya avo'ene monene ali'ya Yelusalemua ugahae.

4 Ugahagi nagaya visua nagesa hisugenofena amakaya nagai¹ene ugahae.

Polo'a Kolini mainaya vea¹ne momakesia ke humaine.

5 Masetonia kotega mainaya anaga¹mogamina mogete¹na tamakaitega egahue.

6 Ne¹e¹na nago kanafina tamakai¹ene yasima alisia ikatela maine¹na alulegama ugahe hisuge-tama nagaila naya hutama ali kate nategahae.

7 Anumayamo¹a kanalene hisige¹na nagayama visuana tamakete¹na aupa¹a tamatale¹na visua yafe onahaigi nago¹ene aya¹aya kanagefa tamakai¹enena maisua nagesa nehavue.

8 Efesusi kumate maine¹na kave¹ma afulesia kanahe muse hisaya imu kisaya kanamo¹a falote hutesige¹na ugahue.

9 Meni kanafina Anumaya Koti¹a agai kea hamapaisuafe fita yakinateno tusi¹a ali'yana namige¹na ne¹aluge¹ya kasago¹ya vea¹mo¹ya ani kea nehaviyanagi ani kemona kame vaya¹a kasago¹ya vaya mainae.

10 Nagaya Anumaya Koti ali¹ya ne¹alua kava huno Timoti¹a Anumaya Koti ali¹ya ne¹alianagino tamakaite¹ma visiana tamakaife kolia ohuno aipamo¹a falu nehinageno kanale¹ya huno maino.

11 “Afa kano maine.” hutama hu-haviya hu-o¹ateho. Falu yapi mainesigetama aya hutama hutesageno nagaya mainolega kanale¹ya huno eteno esie. Agayaene nago¹a nafu¹nagana¹yaene esayafe amakava mainoe.

12 Apolosi'a nenafufe nehue nago'a nafu'nagana'yaene “Kolini kumate vuo” hu'na hamapaite hamapaite nehuanagi “Menia o'visua nagesa nehianagi'na o'ugahugi haenagama visua kana'ni'ama hanesige'na ugahue.” huno humaine.

Polo'a nago'a atupa kea humaine.

13 Ka'yetama mainetama Yisasife havitama lamakupi malenaya yana atafa hutama kolia ohutama lokiya vaitama maiho.

14 Nelama-fugamifena tamahau tamayamopafi nelahainage-tama muki'a kavala hiho.

15 Tamakaya Setefanasifena havi-mainae. Kaliki kotega agai'ene agai'a afamo'aene hagote'ya amaku'a aiyahae hute'ya Yisasife havi'ya amakupi malenayapiti muki'a kanafina Yisasi anagala amaya humainae.

16 Na'a kava humaine'ya Anumaya Koti ali'yana tusiya hu'ya ne'aliya vea'mogami amaiya'afi maiho.

17 Tamakaya alulega mainetama naha'omaenayanagi menia Setefanasi'ene Fotunatusi'ene Akaikusi'ene nagaitega age'na naha'nemaeyafe tusi'a muse nehue.

18 Amakaya tamakaifema me nahapaigeno naipamo'a kanale'ya hige'na muse nehue. Muse nehuafe tamakai tamaipamo'a ani'a huno kanale'ya humaine. Na'a kava nehaya vayafena tusi'a muse hutama amakia alisaga hiho.

19 Esia kotega alu kumate kumate maine'ya Yisasife havi'ya alitalu nehaya veala “Mainafio?”

hu'ya hu falu fala hunelamatae. Akuvila'ene Palisila'ene anakai nopima Yisasife havi'ya melitalu nehaya veala Anumayamo'ene ailokae'ya maine'ya “Mainafio?” hu'ya hu falu fala hu nelamatae.

²⁰ Muki'a mafi mainaya tafu-taganaga'ya “Mainafio.” hu'ya hu falu fala hu nelamatae.

Tamakaya Anumaya Koti anaga mainayafe nagoke nagoke'mogatama tamayana o'ami a'ami hutama maiho.

²¹ Nago'a kea nago kanomona hapaugeno kae-maleneanagi nagaya Polo'na mamona atupa avona nagai'ni nayapiti kae'na nelamamue.

²² Anumayamofe havino hau ayamopafi noma-lea kanomona Anumaya Koti'a ali haviya hutesie. “Anumayatimogae aup'a eno.” hu'na nehue.

²³ Anumayati Yisasi kayone yama'a tamakai'ene hanesie hu'na nehue.

²⁴ Yisasi Kalaisi'ene aiga'mae'na tamakaila naipa nelamamue. Tamage.

Ke'nia male ha'no hie.

Nagai'ni nagia Polo'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 18 Apr 2025 from source files dated 31 Aug 2023

55807fd5-1005-5405-89da-5533a7950c65